

**KALAALLIT NUNAANNI**

**AKILERAARUTISSAT**

**ILANNGAATIGINEQARNERAT**

Namminersorlutik Oqartussat - Akileraartarnermut Aqutsisoqarfik

Marts 2019

## Aallaqqaasiut

Ilitsersuutip matuma sulisitsisut allallu akileraarutinik A-nik unerartitsisussat, aningaasarsianik A-nik aningaasarsisitsinermi akileraarutinillu A-nik aamma SA (sulisoqarermut akitsuut) unerartitsinermi maleruagassanik paasissutissippai. Ilitsersuummi pineqarput maleruagassat 1. december 2018-mi atuuttut.

Ilitsersuummut matumunnga tapiliussatut naqitamik immikkut peqarpoq "Kalaallit Nunaanni akileraarutissat ilanngaatigineqarnerat - tapiliussa", tassanilu aningaasarsiat aningaasarsianut A-nut, B-nut kiisalu akileraaruteqaataasussaanningsunut immikkoortiterlugit takussutissiorneqarsimapput. Taanna Akileraartarnermut Aqutsisoqarfiup nittartagaani [www.aka.gl](http://www.aka.gl)-imi aaneqarsinnaavoq.

Annertunerusumik paasisaqarusukkuit tikilluaqquneqarputit Akileraartarnermut Aqutsisoqarfimmut, Sulisitsisut Nalunaarsorsimaffiannut imaluunniit Akiliisitsiniartarfimmut ilanngaartuussinerit pillugit saaffiginninnissannut:

### **Akileraartarnermut Aqutsisoqarfik**

Postboks 1605

3900 Nuuk

### **Sulisitsisut Nalunaarsorsimaffiat**

Telefon nr.: (+299)34 60 81

Telefax nr.: (+299)34 65 77

E-mail: [sulinal@nanoq.gl](mailto:sulinal@nanoq.gl)

Nittartagaq: [www.aka.gl](http://www.aka.gl)

WEB-ikkut nalunaaruteqarneq: <https://sulinal.nanoq.gl>

Akiliisitsiniartarfik

Telefon nr.: (+299) 34 55 03

Email: [Inddrivelsen@nanoq.gl](mailto:Inddrivelsen@nanoq.gl)

## **IMARISAI**

1. Pingaarnerit pillugit takusassiaq.
2. Aningaasarsiat A-t suuppat?
3. Akileraarutit A-t ilanngaatigineqartussat naatsorsorneqartarnerat.
4. Akileraarutit A-t aamma sulisoqarnermut akitsuut pillugit nassuiaat sukumiisoq akilerneqarnerilu.
5. Akissarsiat allagartaat ukiumoortut aamma akissarsiarititanut nalunaarut ukiumoortoq.
6. Aningaasarsiat A-t, akileraarutit A-t aamma sulisoqarnermut akitsuut pillugit naatsorsuutit.
7. Sulisitsisut Nalunaarsorsimaffiannut nalunaarneq.
8. Sulisitsisunik nakkutilliineq.
9. Sulisitsisup akisussaaffia, akiliinissamut akisussaatitaanera pillarneqarsinnaaneralu.
10. Assersuutit akeqanngitsumik atugaqartitaaneq
11. Sulisunik attartuineq

Ilanng. 1. Naatsorsuinermit assersuutit.

Ilanng. 2. Nassuiaatip sukumiisup A1-ip immersornissaanut assersuut

# 1. Pingaarnertit suuneri

## **Kikkut unerartitsisussaataappat?**

Akilaraarutinit A-nik unerartitsisussatut pisussaavoq kinaluunniit Kalaallit Nunaanni najugaqartoq nammineq akilerlugu aningaasarsianik A-nik aningaasarsisitsisartoq. Takuuk Akileraartarnermut inatsit §76, imm. 1.

Akilaraarutinit A-nik unerar-titsinissamut pisussaapput sulisitsisut tamarmik, tassa ataasiinnarmik sulisoqarnera imaluunniit ilaannikkuinnaq ikiortimik aningaasarsisitsisarnera apeqqutaatinnagu.

## **Aningaasarsiat A-t**

Aningaasarsiat A-t amerlanertigut tassaapput aningaasarsiat tapinik sunik tamanik ilallit, sulisitsisup sulisitaminut (aningaasarsiortumut) aningaasarsiarititai. Aningaasarsiat allat aamma aningaasarsiat A-tut isigineqarlutik ilaatinneqartarput, soorlu siulersuisunut ilaasortaanermi akissarsiat, soraarnerussutisiat aamma aningaasat utaqqiisit, nipilersortartutut akissarsiat, freelancetut nutserisartutut akissarsiat il.il., tak. akileraartarnermut inatsimmi § 75 kiisalu tassunga tunngatillugu aningaasarsiat akilaraarutit aamma sulisoqarnermut akitsuutip akilerneqartarneri pillugit Namminersorlutik Oqartussat nalunaarutaat nr. 10, 20. September 2011-meersoq.

## **Piffissaq unerartitsivik/ilanngaassiffik**

Akilaraarutinit ilanngaaneq pissaaq aningaasarsiat A-t tunniunneqarneranni. Taamaattorli feeriarnerisutitut qaammammullu siumoortumik akissarsialinnut allanik maleruagassaqqarpoq – immikkoortumi allami takukkit allaaserineqarneri.

## **Sulisitsisup pisussaaffii**

Sulisitsisut allallu unerartitsisussaataasut makku isumagissavaat:

- Akileraartarnermut Aqutsisoqarfimmi Sulisitsisut Nalunaarsorsimaffiannut nalunaassapput,
- aningaasarsiortut skattekortii pissarsiarissallugit paasissutissallu skattekortini allasimasut allattorlugit,
- aningaasarsianik A-nik aningaasarsisitsinerit tamaasa akilaraarutinit ilanngaattissat naatsorsortarlugit,
- Maleruagassat immikkut ittut tunngavigalugit feeriarnerisutissat katersat akilaraarutinit ilan-ngaattissat naatsorsorlugit,
- aningaasarsisitsinerit tamaasa aningaasarsiat A-t aamma akilaraarutit A-t naatsorsorneqarfiannik aningaasarsiortumut tunniussisarnissaq,
- qaammatip siuliani aningaasarsiat A-t, akilaraarutit A-t aammalu kiisalu sulisoqarnermut akitsuut pillugit nassuiaammik sukumiisumik qaammatit tamaasa nassiussisarnissaq,
- qaammatip siuliani akilaraarutit A-t unerartitat kiisalu sulisoqarnermut akitsuut qaammatit tamaasa akilertarnissaat,
- qaammatisiutit malillugit ukiut naaneri tamaasa sulisorisat ukiup ingerlanerani aningaasarsianik A-nik akissarsiaat aamma akilaraarutinit A-nut akilaraarutaat tamarmiusut pillugit akissarsiat allagartaannik ukiumoortunik (A11-nik) nassiussinissaq. Aammattaq akissarsiat

allagartaanni nalunaarneqassapput sulisorisap soraarnerussutisiaqarnissamik imaluunniit inuunermut sillimmasiinermt aaqqissuussinernut ilaaffigisaanut sulisitsisup akiliutai, kiisalu akeqanngitsumik tamakkiisumik ilaannakortumilluunniit ajunngitsorsiaasimasut, soorlu nerisaqarlunilu ineqarneq, illoqarneq, najugaqarneq, angalaneq, biileqarneq aamma telefoneqarneq il.il. Sulisitsisunut nalunaarsuiffik aningaasarsiorlorlu tamaasa ataatsimik nassinneqassapput.

- akissarsiat allagartaannut ukiumoortunut ilanngullugu nassiuunneqassaaq akissarsiarititanut nalunaarut ukiumoortoq (A10) suliffeqarfiup aningaasarsianik A-nik akissarsiaritissimasaasa aamma akileraarutitut A-nut unerartissimasaasa kiisalu akissarsianik il.il. aningaasarsiat B-usunik imaqartoq. Kisitsisit allanneqartut akissarsiat allagartaanni ukiumoortuni ilanngunneqartuni kisitsisit katinneri kiisalu ukiup ingerlanerani nassuiaatit sukumiisut nasiunneqarsimasuni kisitsisit katinneri assigissavaat.

## 2. Aningaasarsiat A-t suuppat?

Sulinermt akissarsianik il.il. (aningaasarsianik A-nik) aningaasarsisitsinerit tamaasa akissarsiasanit akileraarutit A-t naatsorsorneqartassapput. Akileraarutit A-t "0"-imik amerlassuseqarsinnaapput, taamaattorli akissarsiat tunniunneqartut aningaasarsiatut A-tut suliarineqassapput.

Akileraarutit A-nik ilanngaaneq unerartissisussaaitamit isumagineqassaaq. Taanna tassaavoq aningaasarsianik il.il. akiliuteqartoq (sulisitsisoq taassumaluunniit piginnaatitaa).

Aningaasarsiat A-t tassaapput

- suliffeqarnermt (atorfinitisitaanermut) atatillugu sulinermt inuup aningaasarsiat akissarsiaallu aningaasannorlugit - tassa imaappoq *aningaasarsiat tapinik sunik tamanik ilallit*. Taamaattorli akeqanngitsumik ineqarnerup/illoqarnerup, akeqanngitsumik nerisaqarnerup, nioq-qutissat aamma pissarsiat aningaasannngitsut nalingi aningaasarsiatut A-tut isigineqanngilat. Takuuk Akileraartarnermt inatsit §75, imm. 1, nr. 1.
- siulersuisuni, ataatsimiititani, kommissionini, siunnersuisoqatigiinni assigisaanniluunniit ilaasortatut ikiortitulluunniit akissarsiat. Takuuk Akileraartarnermt inatsit §75, imm. 1, nr. 2.
- aningaasarsiat allat (soraarnerussutisiat, aningaasat utaqqiisit, pisortanit pensionit tunngaviusut, naartunermi meerartaarnermt meeravissartaarnermtulu sulinnngiffeqarnermt ullormusi-at, aningaasarsianut annaasanut imaluunniit suliffissaagaluanut annaasanut taartisiat, namminersuutigalugu tusarnaartitsisartutut, isiginnaartitsisartutut, nipilersortartutut, atuakkiortutut, allatullu eqqumiitsuliortutut, timersortartutut, allaaserinnittartutut, dommeritut, eqqartuusseqataasutut, illersuisutut, namminersorluni nutserisutut ingerlatsinermt (freelance) akissarsiat aammalu tunisinermt isertitat il.il.), nalunaarusiaq nr. 10, 20. september 2011-meersoq.
- Aningaasarsisitseriaatsip qanoq iluseqarnera (aningaasarsiat aalajangersimasuuneri nikerartuuneri-luunniit) apeqqutaanngilaq. Taamaattumik soorlu sillimmasiisarfinni tuniniaasut il.il. provisionisiaat aningaasarsiaapput A-t.

## **Suliffeqarnermi/atorfeqarnermi pissutsit**

Suliffeqarnermi/atorfeqarnermi pissutsit ilaatigut ilisarnaatigaat, aningaasarsianik pissarsisartoq suliaqartarmat sulisitsisup unnersuussutai malillugit aamma taassuma akiligaanik.

Akerlianik namminersorluni suliffeqarfiuteqarnerup ilisarnaatigaa nammineq akiligassatut akissusaaffigisassatullu, sinneqartooruteqarnissaq anguniarlugu aningaasarsiummik suliffiuteqarneq.

Matumani apeqqutaanngilaq akissarsiaq aningaasanik pissarsisup pingaarnertut saniatigooraluguluunniit isertitarineraa, imaluunniit akileraarutinut B-nut akiliteqaataasunik allanik isertitaqarner-soq.

Pisariaqanngilaq aalajangersimasumik atorfeqartoqarnissaa. Suliffeqarneq sivikitsuinnaagaluarpal-luunniit aningaasarsiat aamma A-jussapput - soorlu assersuutigalugu aningaasarsiortoq ullormi ataasiinnarmi sivikinnerusumiluunniit sulisinneqarsimappat. Aamma taamaappoq aalisartoq aallar-nermi ataatsimi ikiorteqarsimappat. Akissarsiap annertussusaa matumani apeqqutaanngilaq.

Aningaasarsiat suliffeqarnikkut aningaasarsiat A-juneri imaluunniit namminersorluni suliffiuteqar-nikkut aningaasarsiat B-uneri nalornissutigineqarpata, aalajangiinermi tunngavigineqassaaq suline-rup ataatsimut isigalugu suunera. Matumani ilaatigut pingaartinneqassaaq aningaasarsisitsisup sulia-mik siulersuisinnaanera agguataarisinnaaneralu, matumani ilaalluni suliamik nakkutilliisinnaanera aammalu suliarinissaanut ilitsersuisinnaanera.

Nalornissuteqartoqartillugu Akileraartarnermut Aqutsisoqarfimmut, Sulisitsisut Nalunaarsorsimaffi-annut apeqquilliisoqartariaqarpoq. Takuuk Akileraartarnermut inatsit §75, imm. 5.

## **Aningaasarsianut tapit aamma immikkut akissarsiaritit**

Nalinginnaasumik aningaasarsianut tapit allanullu immikkut akissarsiaritit, suliffeqarnermi akissarsianut ilaatinneqartussatut assersuutigineqarsinnaapput:

- feeriarnersiutit,
- nioqqutissat akitsoriartornerinut nalimmassaatitut tapisiat assigisaannilluunniit iluarsisutit,
- qaangiuttoornermi, piffissap suliffiup allanngorartuunerani, sapaammi sulinermi, unnuakkut sulinermi assigisaannilu akissarsiat,
- akkord-terluni sulinermi akissarsiat, akissarsiat immikkut ittut kiisalu oqaatsit pillugit tapit, formanditut tapisiat aamma pisinnaasat naapertorlugit tapit,
- provisionisiat, iluanaarutinit kajumissaatitut tapisiat, nalliuttorsiornermut atasumik akissar-siat, agguagarsiat assigisaallu,
- immikkut tapisiat imaluunniit nalliuttorsiornermi (nalliuttorsiornermulli atasumik akissar-siat atorfillit maleruagassaat malillugit tunniunneqartut ilaanngillat), soraarnermi, napparsi-manermi ilaqutariinnilu pingaartorsiortoqartillugu tunissutisiat,
- tapit aningaasanngorlugit tunniussat tamarmik (ineqarnermut, biileqarnermut il.il. tapisiat) aningaasarsiaapput A-t.

Ataatsimut isigalugit oqartoqarsinnaavoq aningaasat sulisitsisup aningaasarsiortup sulineranut akili-utai tamarmik aningaasarsiaapput A-t. Takuuk Akileraartarnermut inatsit §75.

## **Immikkut ittumik aningaasarsiarititat aningaasarsiat A-jusut**

Immikkut ittumik aningaasarsiarititat aammattaq aningaasarsiat A-jusut makku taaneqarsinnaapput:

- Aalisartup procentisilluni akissarsiai aamma agguagarsiai

tassaapput aalisartup (angallammik piginnittup imaluunniit attartortup) aallarnerit tamaasa tunisanit isertitami ilaannit ikiortini procentisillugit akissarsisikkaangagit. Aamma taamaappoq kingusinnerusukku agguagarsiassanik tunniussisoqassatillugu.

- Aningaasarsiortoq sullitanit akiliiffigineqaraangat

Tassaavoq aningaasarsiortoq sulisitsisuni sinnerlugu sullitanit assigisaannillu akiliiffigineqaraangat, aningaasallu ilaat nammineq akissarsiassamisut tigummiinnarlugit. Tamanna soorlu taxanik ingerlatitsisunit atorpeqarpoq, naak tamanna "attartornertut" isikkoqaraluartoq.

- Sunngiffimmi suliffeqarneq

Soorlu assersuutigalugu allaffimmiup sunngiffimmini namminersortup naatsorsuutai, isumaqatigiissuteqarneq naapertorlugu aalajangersimasumik akilerneqarluni suliarigaangagit. Tamanna atuuppoq nalunaaquttap akunnermusiaqartitsisoqarpat imaluunniit qaammammut ukiumulluunniit aalajangersimasumik akissarsiaqartitsisoqarpat.

- Selskabini pisortat

Aktie- imaluunniit anpartsselskabimi pisortaq selskabimit akissarsigaangat. Tamanna atuuppoq akissarsiassat aalajangersimasumik annertussuseqanngikkaluarpataluunniit, aammalu pineqartup piginneqataassutit amerlanersaat pigigaluarpagilluunniit.

- Nipilersortartoqatigiit

Sutorniartarfiutilik imaluunniit peqatigiiffik nipilersortartoqatigiinni peqataasunut ataasiakkaanut akissarsisitsigaangat. Tamanna atuuppoq nipilersortartoqatigiit piffissami aalajangersimasumi imaluunniit unnummi ataasiinnarmi nipilersorsimagaluarpataluunniit, aamma akissarsiassat nipilersortartumut imaluunniit inummut allamut, selskabimut il.il. tunniunneqaraluarpataluunniit.

## **ATP-mut soraarnerussutisiaqarnissamillu aaqquissuussinernut assigisaanut akiliutit**

Aningaasarsiat ilaat, aningaasarsiortup ATP-mut aamma soraarnerussutisiaqalernissaq siunertaralugu aaqquissuussinernut allanut, *ingerlaavartumik tunniunneqarumaartussanut* aammalu naafferartumik akilersuilluni sillimasiutitut akiliutit sivikinnerpaamik ukiuni qulini amerlaqatigiiaarlugit tunniunneqartarumaartussat akileraartarnermut inatsimmi § 39-mi § 40-milu ilaatinneqartunut akiliutissaasut sulisitsisup unerartitai aningaasarsianut A-nut ilaatinneqassanngillat. Soraarnerussutisiaqalernissamut aaqquissuussinernut taamaattunut sulisitsisup akiliutai aamma ilanngunneqassanngillat.

Akiliutit tamakkiisut (anigaasarsior tup sulisitsisullu akiliutaat) akissarsiatut isigineqartussaangit-sut anigaasarsior tup anigaasarsiaasa tamakkiisut 15 procentiinit annerussanngillat.

Soraarnerussutisiaqalernissamut aaqqissuussinernut aamma inuunermut sillimmasiissutinut allanut, matumani ilaallutik sillimmasiinerit akit nikerarneri najoqqutaralugit iluarsineqartartut, ajunaarnis-samut sillimmasiinerit aammalu soraarnerussutisiaqalernissamut aaqqissuussinernut siuliani taak-kartorneqartunit allaanerusunut akilersuutit anigaasarsiat akileraaruteqaataasussat naatsorsornerini ilanngaatineqarsinnaanngillat. Aaqqissuussinermut sillimmasiiner mulluunniit akiliutit piginnittu-mit (anigaasarsior tumit) akilerneqaratik allamit (nalinginnaanerusumik sulisitsisumit) akilerneqar-pata, akiliutit piginnittup (anigaasarsior tup) anigaasarsiaanut A-nut akileraaruteqaataasussanut ilanngunneqassapput.

Aaqqissuussinerit ilanngaataasinnaagaluit danskit soraarnerussutisianik akileraarusiisarnermut i nat-sisaanni § 53 A malillugu akileraarusigassanngortinneqarsimappata, taakku ilanngaatineqarsin-naanngillat, taamaammallu sulisitsisoq akileraarutinut A-nut ilanngaassissaaq.

### **Ullormusiat angalanermilu ajunngitsorsiat**

Pisortani suliner mut atatillugu angalanermi, najugaqarnermi nerisaqarnermilu anigaasartuuteqar-nerunermut matusissutissatut imaluunniit atorfillit pillugit maleruagassat malillugit ullormusiat angalanermilu ajunngitsorsiasat akileraaruteqaataasussa anngillat, tak. akileraarnermut inatsimmi § 34, imm. 1, nr. 8, taamaasillutillu anigaasarsianut A-nut ilaatinneqassanatik.

**Tamatumani tunngavigineqartussatut piumasaavoq nalinginnaasumik *Kalaallit Nunaanni najugarisag qimassimagallarlu* allamiikkallarnissaq.** Atorfillit pillugit maleruagassani annertussusiliineq sinnerlugu tunniussisoqarpat anigaasat anigaasarsiatut A-tut isigineqassapput.

### **Sulisitsisoq sinnerlugu akiliutit**

Anigaasat, anigaasarsior tup sulisitsisuni sinnerlugu akiliutigigallarsimasai matussuser niarlugit sulisitsisup anigaasarsior tumut immikkut tunniussai anigaasarsianut A-nut ilaatinneqassanngillat.

Aamma tamanna atuuppoq anigaasarsior toq anigaasanik sulisitsisup anigaasartuutaanut matus-sutissanik tunineqarpat, soorlu assersuutigalugu anigaasarsior tup sulinerminut atatillugu angalane-rani (angallanneqarnermut, akunnittarfimmi najugaqarnermut, nerisaqarnermut il.il.). Taamaatto-qarnerani piumasaavoq anigaasarsior tup anigaasartuutigisimasani kingusinnerusukkut naatsor-suusiussagai.

Taamaattoqarneranik uppernarsaatitut sulisitsisup naatsorsuutaani ilaassapput bilagit assilisaannaan-ngitsut.

### **Inuinnaat illumi ikiortaat**

Inuinnaat illumi kiffaminnut ikiortiminnullu allanut anigaasarsiarititaat anigaasarsiatut A-tut isi-gineqanngillat anigaasarsiat B-ullutilli. Tamannali aatsaat atuutissaaq ikiorti pineqartoq sulisitsisup illuinnaani sulisarpat. Takuuk Nalunaarut nr. 10, 20. september 2011-meersoq §8, imm. 2. Ikiortili sulisitsisup illuani aammalu taassuma - aapparisaataluunniit - suliffeqarfiutaani



sulisarpat, aningaasarsiat ilaat suliffeqarfiup ingerlatsinermi aningaasartuutaasut ilanngaatigineqarsinnaapput. Taamaattoqartillugu aningaasarsiat tamarmik aningaasarsiatut A-tut isigineqassapput.

### **Taarsigassarsiat**

Aningaasarsiasanit siumoorutit aningaasarsiatut A-tut isigineqassapput.

Akerlianilli sulisitsisup aningaasarsiortoq aningaasanik taarsigassarsisippagu taakku aningaasarsiat A-junngillat. Taamaattoqarpat taarsigassarsineq uppersarsarneqartariaqassaaq, soorlu assersuutigalugu akiitsoqarnermut uppersarsaammik, soorluttaaq aningaasat taarsigassarsiaritit sulisitsisup aningaasarsiaritit naluassanngikkai. Taarsigassarsiat aningaasarsianit ilanngaassuinnikkut akilersortinneqarpata tamanna akileraarutit naatsorsornerannut attuumassuteqanngilaq. Akileraarutit A-t naatsorsorneqarneranni aningaasarsiat tamarmiusut aallaavigineqassapput.

### **Kiffartuussinermi kajumissaatissiissutit (drikkepengit)**

Kiffartuussinermi kajumissaatissiissutit aningaasarsiaapput B-t. Takuuk Nalunaarut nr. 10, 20. september 2011-meersoq § 8 imm. 1.

### **Meeqqat isertitaat**

Nammineq meerarisamut, meerassamut, meerarsiamut imaluunniit ernguttamut akissarsiaritit, meeraq qaammatsiutit malillugit ukiumi pineqartumi 1. januar suli 15-inik ukioqalersimangippat, tak. akileraartarnermut inatsimmi §5, stk. 3, namminersorluni inuussutissarsiummik ingerlataqartup aningaasarsiaasa akileraaruteqaataasussat naatsorsorneranni ilanngaatigineqarsinnaanngillat, taama-tullu aamma akissarsiat meeqqap aningaasarsiaanut akileraaruteqaataasussanut ilaatinneqassanatik.

Taamaattumik nammineq meerarisap il.il. aningaasarsiai akileraarutitik ilanngarneqassanngillat. Tamannali atuutinngilaq suliffeqarfik selskabiuppat sulinerullu annertussusia uppersarsarneqarsinnaappat.

Allatigulli tamatigit meeqqat aningaasarsiaat aningaasarsiaapput A-t, aningaasarsiallu amerlassusaat apeqqutaatinnagit maleruagassat nalinginnaasut malillugit pineqassallutik. Takuuk Akileraartarnermut inatsit §5, imm 1.

### **Aningaasarsiat A-t allat**

*Siulersuisuni ilaasortatut akissarsiat il.il.*

Siulersuisuni, ataatsimiititaliani, kommissionini, siunnersuisoqatigiinni assigisaanniluunniit ilaasortatut ikiortitulluunniit ajunngitsorsiat aningaasarsiaapput A-t. Takuuk Akileraartarnermut inatsit § 75 imm. 1 nr. 2.

Apeqqutaanngilaq aktie- imaluunniit anpartsselskabiunera, peqatigiiffiunera, namminersorluni imaluunniit pisortat pigisaattut ingerlatsiviunera imaluunniit pisortatigoortumik siunnersuisoqatigiuneri assingusuuneriluunniit. Aamma apeqqutaanngilaq suliaq inuussutissarsiutitut imaluunniit inuinnartut ingerlanneqarnerseq, soorlu assersuutigalugu timersoqatigiiffiunersseq, piginneqatigiilluni il-

luuteqaaqatigiit peqatigiiffigineraat imaluunniit inuk pineqartoq ataatsimeersuarnermi qinigaanersoq allatulluunniit toqqagaanersoq. Aammattaaq apeqqutaanngilaq nammineq kajumissuseq tunngavigalugu ilaasortaaneq imaluunniit suliaq soorlu assersuutigalugu innuttaaqataasut suliaasaqartitaanermik pisussaaffiuersoq.

Tassa imaappoq peqatigiiffimmi siulittaasup, aningaaserisup imaluunniit siulersuisuni ilaasortap akissarsiai aningaasarsiaapput A-t. Tamanna aamma atuuppoq assersuutigalugu kommunalbestyrelsini ilaasortatut, siulersuisuunerni ilaasortatut, ataatsimiinnermi aallartitatut peqataasutut, ataatsimeersuarnerni ilaasutut akissarsianut, matumanilu ilaapput sulinermi isertitassaraluanut annaasanut taartisiat. Aammattaaq suliffeqarfiup siulersuisuini ilaasortat sulisunit sinniisutut qinikkat akissarsiaat aningaasarsiaapput A-t.

Siulersuisunut, ataatsimiititalianut il.il. ikiortit akissarsiaat aamma tassaapput aningaasarsiat A-t, tassa atorfinitsinneqarsimannngikkaluaraanniluunniit. Taamaattorli tunngavigineqartassaaq aalajangersimanerumik attuumassuteqartoqarnera. Taamaattumik ilaannikkuinnaq ikiorteqarnermi, soorlu assersuutigalugu inatsisilerituumik kukkunersiuisumilluunniit, akissarsiarititat aningaasarsiat A-junngillat.

*Pensionisiat, aningaasat utaqqiisit assigisaallu akileraaruteqaataasussat*

*Soraarnerussutisiat*

Pensionisiat, aningaasat utaqqiisit assigisaallu akileraaruteqaataasussat siusinnerusukkut atorfigisimasamut attuumassutillit tassaapput aningaasarsiat A-t. Takuuk Nalunaarut nr. 10, 20. september 2011-meersoq § 7 imm. 3.

Aamma ilaapput soraarnerussutisiaqarnissamut karsinit imaluunniit sillimmasiisarfinit, atorfimmut attuumassuteqanngitsumik sillimmaserneqarnissamik isumaqatigiissuteqaataasimasoq naapertorlugu tunniunneqartut, tunniunneqartut makkuuppata:

- utoqqalinersiutit (inuunerup sinnerani tunniunneqartartussat)
- innarluuteqalernermi soraarnerussutisiat
- aapparisap toqukkut qimagunnerani pisartakkat
- meeqqat toqukkut qimagaasut pisartagaat
- imaluunniit sillimmaseeriaatsit pineqartut akuleriissillugit pisartakkat.

Takuuk Nalunaarut nr. 28, 1. december 2006-meersoq, § 7 imm. 5.

Soraarnerussutisiaqarnissamilli aqqissuussinerit taagorneqartut arlaata atorunnaarsinneqarneratigut danskit soraarnerussutisianik akileraarusiisarnermut inatsisaanni kapitali 1 malillugu akileraartoqarsimappat, aningaasat tunniunneqartut aningaasarsiat A-jussanngillat. Takuuk Akileraartarnermut inatsit § 44 imm. 5.

Inuunermet sillimmasiissutit ataatsikkut akiliilluni sillimmasiinernit tunniunneqartut tigusisumut akileraaruteqaataassanngillat, taamaattumillu aningaasarsianut A-nut ilanngunneqassanatik. Takuuk Akileraartarnermut inatsit § 44, imm. 2.

### *Aningaasat utaqqiisit*

Aningaasat utaqqiisit, ilaatigut aningaasarsiasarigaluanut taarsiullugit tunniunneqartartut tassaapput aningaasarsiat A-t.

### *Taaneqartut assigisaat akileraaruteqaataasussat*

Ingerlaavartumik akiliutit, soraarnerussutisiatut imaluunniit aningaasatut utaqqiisitut taaguuteqanngitsut sulisitsisup sulisorisimasaminut taassumaluunniit ilaqutaanut tunniuttagai - tassa nammineq piunmassuseq tunngavigalugu soraarnerussutisiatut ilusiliilluni akiliutigineqartartut - tiguisumut aningaasarsiaapput A-t. Tamanna atuuppoq akiliutigineqartartut ingerlaavartuuppata ilaannikku-innarluunniit tunniunneqartarpata, soorlu assersuutigalugu ukiumoortumik. Takuuk Akileraartarnermut inatsit § 75 imm. 1.

Tamanna aamma atuuppoq aningaasanut, sulisorisimasap toqukkut qimagussimasup qimataanut piffissami sivikitsumi tunniunneqartartunut. Aningaasat tunniunneqartut toqusumut aningaasarsiatut A-tut isigineqassanngillat, kisiannili aningaasanik tiguisumut. Taamaattumik akileraarutit ilanngaatigineqartussat qimataasup skattekortia malillugu naatsorsorneqassapput. Aningaasalli tunniunneqartut toqusup pigisaanut ilaasussanngorlugit tunniunneqassappata, taakku aningaasarsiatut A-tut isigineqassanngillat.

Soraarnermi ajunngitsorsiasat, allatulluunniit - soorlu utoqqalinikkut, nappaateqarnikkut allamil-luunniit peqquteqartumik - atorfiup qimalernerani ataasiaannartumik akissarsiat aamma aningaasar-siaapput A-t. Takuuk Akileraartarnermut inatsit § 34.

## **3. Akileraarutit A-t ilanngaatigineqartussat naatsorsorneqartarnerat**

### **Piffissaq akileraarutit ilanngaatigineqarfiat**

Akileraarutit A-t nalinginnaasumik unerartinneqassapput aningaasarsiat A-t tunniunneranni. Takuuk Akilerartarnermut inatsit § 76.

Akissarsiaannaat kisimik pineqanngillat, aammali akorternersiat, agguagarsiat, kiffartulussinnarna-veeqqutit, iluanaarutinit kajumissaatitut tapisiat aammalu akissarsiat immikkut ittut allat, piffissami pisassarilereernerisa kingorna tunniunneqartut. Aningaasarsior-tup akissarsiasani qanga akissarsias-sarilersimanerai (akissarsiasat qanga pisassarilersimanerai) apeqqutaanngilaq.

Nalliuttuni sapaataanngitsuni akissarsianut feeriarnersiutinullu tunngatillugu immikkut ittunik male-ruagassaqarpoq - taakku kingorna takukkit.

Aningaasat ukiumi, ukiup pisassarilerfiisa tulliani aatsaat tunniunneqarpata, aningaasarsiat A-t aki-lera-arutillu A-t piffissamut tunniunneqarfiinut tunngatinneqassapput. Aningaasarsiat A-t aamma akileraarutit A-t akissarsiat allagartai il.il. atorlugit paasissutissiinermi ilaatinneqassapput ukiumi tunniussiffiusumi.

Aningaasarsisussaq akileraartussaajunnaarpat aningaasarsiat A-t, matumani ilaallutik akileraartussaajunnaarnek sioqqullugu akissarsiaqarluni feeriarnissamut katersat, kingusinnerpaamik akileraarusersorneqassapput piffissami akileraartussaajunnaarfimmi. Akileraarutitik A-nik unerartitsineq kingusinnerpaamik pissaaq piffissami tassani.

Piffissap akissarsiorfiup qaangiutereerneratigut akissarsiat millissutaat ukiumut aningaasarsiorfimmut attuumassuteqarfigisaannut ilaatinneqassapput. Akissarsiat millissutaat qaammatisiutit malillugit ukiumut siusinnerusumut tunngassuteqarpata aningaasarsisussap aningaasat tamakkiisut sulisitsisumut utertissavai. Akissarsiat millissutaasa akileraarutit A-t akissarsisitseqqaarnermi ilanngaatigineqarsimasut sunnuteqarfigissanngilaat. Taarsiullugu aningaasarsiorfup akileraarutitut A-nut akiliutigivallaarsimasani inaarummik naatsorsuinnermut nalinginnaasumut nutaamulluunniit atatillugu utertissavai.

Isertitat toqusup toqoreernermigut pisassariligai isertitanik tiguisisumut akileraaruteqaataassapput, tassa toqoreersumuunngitsoq.

Akissarsiat siumoortumik tunniussat qaammammut akissarsiorfiusumut tunngatinneqassapput. Naak januarip qaammataani akissarsiasat ukiup siuliani decemberip qaammataata naalernerani tunniunneqartaraluartut, akileraarutitik A-nik unerartitsineq pissaaq skattekorti nutaaq atorlugu aammalu januarip qaammataani akileraarutitik ilanngaasarnermut maleruagassat malillugit. Januarip qaammataani akissarsiat taakkulu akileraarutitaat ukiumut aningaasarsiorfiusumut akissarsiat allagartaanni ukiumoortumi aatsaat ilaatinneqassapput.

Akissarsiasanit aningaasarsiasanilluunniit A-nit allanit siumoorutit tunniunneqalerneranni tamatigut akileraarutitut A-nut unerartitsisoqartassaaq. Taamaattorli sapaatip akunneranut, ullunut 14-inut imaluunniit qaammammut akissarsiasanit siumoorutitik tunniussisoqartillugu akileraarutitut ilanngaaniissaq aningaasarsiat nalinginnaasumik naatsorsorneqarnissaannut kinguartinneqarsinnaavoq. Sulisitsisup akisussaaffigaa aningaasarsiat naatsorsorneqarneranni akileraarutitut A-nut ilanngaatisanut akissarsiat tamarmiusut siumoorutitik ilanngarneqartinnatik matussutissaqarnissaat.

#### *Sulisunut taarsigassarsisitsineq*

Sulisunut taarsigassarsiarititat, isumaqatigiissut malillugu qanoq taarsersuinissamik, ernialersuinissamik, qularnaveeqqusiinissamillu il.il. tunngaveqartut akileraarutitut ilanngaavigineqassanngillat, taamatullu aningaasat taarsigassarsiarititat sulisitsisup aningaasarsiarititatut nalunaarsinnaanagit. Taamaattumik taarsigassarsiat aningaasarsianit ilanngaatigineqarneri akileraarutitut ilanngaasarnermut attuumassuteqanngillat. Sulisut taarsigassarsiaannik isumakkeerinninnermi isumakkeerneqartut aningaasarsianut A-nut ilaatinneqartassapput.

#### *Nalliuttuni sapaataanngitsuni akissarsiat*

Nalliuttuni sapaataanngitsuni akissarsiat ingerlaavartumik tunniunneqartarpata imaluunniit ukiup aningaasarsiorfiusup ingerlanerani siumoorutitut tunniunneqartarpata, taakku piffissami aningaasarsiorfiusumi tunniunneqarfiini nalinginnaasumik aningaasarsianut A-nut ilangunneqassapput. Taamaattorli nalliuttuni sapaataanngitsuni akissarsiat ukiumi aningaasarsiorfiusumi tunniunneqanngip-pata, taakku akileraarutitaat kingusinnerpaamik ilanngaatigineqassapput ukiumi aningaasarsiorfiusumi ulloq 31. december. Takuuk Nalunaarut nr. 10, 20. september 2011-meersoq § 9.

*Aningaasarsiortoq sulisitsisuni sinnerlugu sullitanit akiliiffigineqaraangat*

Aningaasarsiortoq sulisitsisuni sinnerlugu akiliiffigineqarpat aningaasallu ilaat nammineq aningaasarsiassamisut tigummiinnarpagit, aningaasarsiortup aningaasarsiai A-t naatsorsorneqassapput sulisitsisumut aningaasat sinnerinik tunniussinerit tamaasa, minnerpaamilli qaammammut ataasiarluni. Akileraarutitik ilanngaaneq maleruagassat nalinginnaasut malillugit pisassaaq.

Taamatut aningaasat sinnerinik tunniussinermit aningaasarsiortup pisussaaffigaa aningaasarsiat naatsorsorneqartut tunngavigalugit akileraarutit A-t sulisitsisumut tunniutissallugit. Tunniussisoqanngippat sulisitsisup sulisuni erngerluni soraarsinnaavaa, tak. akileraartarnermut inatsimmi § 80, imm. 2.

Taamatut pisoqanngippat sulisitsisoq akileraarutit A-t akilerneqarnissaannut akisussaatinneqarsinnaavoq. Sulisitsisup tamanna Akileraartarnermut Aqutsisoqarfimmut, Sulisitsisut Nalunaarsorsimaffiannut nalunaarutigisariaqarpaa. Takuuk Akileraartarnermut inatsit § 93.

*Akileraarutitik ilanngaasussaatitaaneq pillugu nalornissutit*

Akileraarutitik A-nik ilanngaasussaatitaaneq pillugu nalornissuteqarnermi apeqqutit Akileraartarnermut Aqutsisoqarfimmut, Sulisitsisut Nalunaarsorsimaffiannut saqqummiunneqartariaqarput. Takuuk Akileraartarnermut inatsit § 75 imm. 5.

Akileraarutitik ilanngaaneq pissusissaatut isumagineqanngippat, sulisitsisoq akileraarutit A-t ilanngaatigineqanngitsut akilernissaannut pisussaatinneqarsinnaavoq, taamatullu tamanna pineqaatissineqarnermik (pillarneqarnermik) nassataqarsinnaalluni. Takuuk Akileraartarnermut inatsit § 93 aamma 105, imm. 1.

## Akilaraarusigassat

Akilaraarusigassat skattekortimilu paasissutissat tunngavigalugit akilaraarutit A-t naatsorsorneqartassapput. Akilaraarusigassat tassaapput aningaasarsiat A-t tamakkiisut (akissarsiat tapinik sunik tamaniq ilallit) *skattekortimi ilanngaammik ilanngakkat*. Akilaraarusigassat naatsorsorneranni aammattaq makku eqqumaffigineqassapput:

- ullormusiat angalanermilu ajunngitsorsiat akilaraartarnermut inatsimmi § 34, imm. 1, nr. 8 malillugu akilaraaruteqaataasussaannngitsut ilanngaanissamut tunngavimmuq ilanngunneqassanngillat
- aningaasat soraarnerussutisiaqalernissaq siunertaralugu aqqissuussinermut, akilaraartarnermut inatsimmi § 39-mi pineqartumut sulisitsisup akiliutai aningaasarsianut A-nut ilaatinneqassanngillat. Matumanissaaq sulisup nammineq akiliutai ilaatinneqassanngillat. Akiliutilli annerpaamik 15 pct.-inik amerlassuseqarsinnaapput, tak. immikkoortoq 2-mi "ATP-mut soraarnerussutisiaqalernissamillu aqqissuussinernut assingusunut akiliutit"
- ilanngaattissat, matumani ilaatigut tassaallutik sulisup taarsigassarsiaminut taartitit akilersugai, aatsaat ilanngaatigineqassapput akilaraarutit A-t ilanngaatigineqareerata.

Akilaraarutit naatsorsorneqannginneranni kisitsinissamut pisariillisaatit akilaraarusigassat, kr.-inut ilivitsunut naatsorsorneqartartut, kisitsimmuq qaninnermut 10-mik agguarneqarsinnaasumut ammut akunnaallineqarsinnaapput. Taava akilaraarutissat A-t naatsorsorneqareerunik kr.-inut ilivitsunut qaninnernut *qummut akunnaallineqassapput*. Takuuk assersuut ilitsersuutip matuma naggataata tungaaniittoq, *ilanngussaq 1*.

Akilaraarusigassat ammut akunnaallineqanngippata akilaraarutit A-t naatsorsorneqartut kr.-inut ilivitsunut qaninnernut *ammud akunnaallineqassapput*.

Takuuk Akilaraartarnermut inatsit § 76 aamma nalunaarut nr. 10, 20. september 2011-meersoq § 13.

## Akilaraarutit A-t naatsorsorneqarnerat

(Assersuutit ilitsersuutip matuma naggataata tungaani takuneqarsinnaapput, tak. *ilanngussaq 1*)

Akissarsisitsilernermi skattekortip paasissutissartai sulisitsisumit pigineqartut atorlugit akilaraarutit A-t naatsorsorneqassapput. Skattekortimi paasissutissat nutaat allannguutilluunniit aatsaat tunngavigineqassapput piffissap akissarsiassanik naatsorsuiffiup naannginnerani pigineqarpata. Tamanna aamma atuuppoq aningaasarsianik A-nik allanik akissarsisitsinermi.

Naatsorsuinermi maleruagassat immikkoortuni ataani nassuiarneqarput:

- Hovedkorti
- Ilangaatissat naatsorsorneqarneri
- Bikorti
- Frikorti
- Skattekorti amigaataappat
- Hovedkortip allannguuteqarnerani

Nalinginnaasumik sulisup pisussaaffigaa hovedkortip sulisitsisumut tunniunnissaa imaluunniit bikortip takutinissaa. Sulisitsisulli taakku amigaatigunigit sulisut skattekortisa paasissutissartaat nunap immikkoortuani akileraaruseriffimmut piniarsinnaavai. Aningaasarsiortulli ilanngaaserneqar-nissaanut piumasaavoq sulisitsisup hovedkorti tigummiassagaa. Takuuk Akileraartarnermi inatsit §§ 79 aamma 80.

### *Hovedkorti*

Hovedkorti nunap immikkoortuani akileraaruseriffimmit sananeqartarpoq, tammarsimagaanilu taar-tissaa aamma tassuuna piniarneqarsinnaalluni.

Aningaasarsiortup hovedkortini sulisitsisumut tunniutissavaa, taassuma paarissammagu. Sulisitsi-sup naatsorsuutimini inuup normua, procenti akileraarutissaq aamma ilanngaatit nalunaarsugassarai. Takuuk Akileraartarnermut inatsit § 79 imm. 1 aammalu nalunaarut nr. 10, 20. september 2011-meersoq, § 16 imm. 2.

Taamaallaat piffissami sulisitsisup hovedkortimik tigummiarnerata nalaani ilanngaasiisoqarsinnaa-voq. Aningaasarsiortup hovedkortimi tigonissaa piumasarippagu, piffissami hovedkortip tunniunne-qarnerata kingorna taanna malillugu ilanngaasiisoqarsinnaangilaq. Tamatuma kingorna skattekortimi procenti akileraarutissaq malillugu ilanngaatitaqanngitsumik akileraarutit ilanngaatigineqassap-put - tassa bikortip atorneqartarneratulli - immikkoortoq tassunga tunngasoq takuuk. Takuuk Akileraartarnermut inatsit § 79 imm. 1 aamma 7 aammalu § 80 imm. 1.

Ukiup ingerlanerani aningaasarsiortoq suliffimmiit soraarpat hovedkorti tassunga tunniunneqassaaq. Takuuk Akileraartarnermut inatsit § 79 imm. 1 aamma nalunaarut nr. 10, 20. september 2011-meersoq § 15 imm. 1.

Qaammatisiutit malillugit ukioq naappat skattekorti sulisumut utertinneqassaaq taassumaluunniit ti-gorusunngippagu suujunnaarsinneqassalluni. Takuuk Nalunaarut nr. 10, 20. september 2011-meersoq § 15 imm. 1.

### *Ilanngaatit naatsorsorneqartarnerat*

Ilanngaatit ullormut, sapaatip akunneranut, ullunut 14-inut aamma qaammammut annertussusaat hovedkortimi allassimapput. Tak. Akileraartarnermut inatsit § 79 imm. 2.

Ullormut ilanngaat nalinginnaasumik taamaallaat atorneqartassaaq ullormut ataasiinnarmut ani-ngaasarsisitsinermi. Tamatuma saniatigut ullormut ilanngaat aatsaat atorneqartassaaq piffissaq ani-ngaasarsiffiusoq "equngatillugu", ilanngaatissanut allanut ilanngullugu.

Piffissamut aningaasarsiorfiusumut, tassa nalliuttut sulinnigiffiillu allat ilanngullugit, naleqquttumik ilanngaasiisoqartassaaq. Toqusimasup akileraarutissaanik naatsorsuinermi ulloq toquffiusoq ilan-ngullugu ilanngaasiisoqartassaaq. Feeriarnermi ilanngaatit pillugit takuuk immikkoortup tullia "Akileraarutit A-t - feeriarnermi ajunngitsorsiat aamma feeriarneriutit".

*Akileraarutissat naatsorsornerini ilanngaateqartitsisoqassappat hovedkorti tamatigut sulisitsisumit tigummineqartassaaq.*

Akileraarutissat naatsorsornerini hovedkorti tunngavigineqarpat piffissaq aningaasarsiffiusoq tamaat ilanngaateqartitsisoqassaaq, tassa aningaasarsiortoq piffissaq tamaat sulisimangikkaluarpaluunniit, imaluunniit akissarsiassat piffissamat aningaasarsiorfiusumut aalajangersimasumut tunngatinneqarsinnaangikkaluarpataluunniit.

Ilanngaatit aningaasarsianit A-nit amerlaneruppata akileraarusigassat "0"-iussapput. **(Piffissamat aalajangersimasumut ilanngaatissat atorneqanngitsut piffissap tulliani atorneqarsinnaapput, aningaasarsior tup skattekortia piffissani pineqartuni marlunni sulisitsisumit tigungmineqarsimappat.)**

*Ulluni sulisup napparsimangersiutinik sulisartut peqatigiiffiannit (SIK-mit) pisartagaqarfiini ilanngaasiisoqassanngilaq.*

SIK-mit napparsimangersiutinik tunniussinermi ullormut ilanngaat atorneqartarpoq, taamaattumik "ulluinnarni" sulisitsisup ilanngaat sulisup napparsimangerata nalaani atortassanngilaa, naak hovedkorti tassannga tigungmineqaraluartoq.

*Naatsorsuinermit assersuutit (piffissaq akissarsiffiusoq kipungasoq)*

Hovedkorti malillugu ullormut ilanngaat 159 kr.-uvoq. Aningaasarsior toq marlunngornermi sulilerpoq. Sapaatip akunnera akissarsiorfik tassaavoq sapaammiit - arfininngornermut.

Ulluni sisamani akissarsiat (marlunngornermiit tallimanngornermut .....	2.500 kr.
Skattekortit malillugu ilanngaatit marlunngorneq}	
pingasunngorneq}	
sisamanngorneq} ullut 5 á 159 kr. ....	795 kr.
tallimanngorneq}	
arfininngorneq}	
Akileraarusigassat .....	1.705 kr.
Kr.-inut ilivitsunut qaninnernut ammut akunnaallineqarsinnaavoq	1.700 kr.

### *Bikorti*

Bikorti atorneqartarpoq aningaasarsior toq sulisitsisunik arlaqartunik ataatsikkut aningaasarsiffeqaraangat. Hovedkorti sulisitsisumit ataatsimit bikortilu sulisitsisut sinnerinit atorneqassaaq. Bikorti ilanngaatitaqanngilaq, taamaallaalli procenti akileraarutissaq allassimalluni. Bikorti sulisitsisumut tunniunnagu takutiinnarneqassaaq, taassumalu inuup normua, procenti akileraarutissaq kommunilu akileraarfik allassavai. Takuuk Akileraartarnermut inatsit § 79 imm. 1 aammalu nalunaarut nr. 10, 20. september 2011-meersoq § 16 imm. 2.

### *Frikorti*

Frikortimi allassimapput aningaasarsiat akileraaruteqaataasussat akileraarusernagit akissarsiarineqarsinnaasut annerpaaffissaat (tassa akissarsinerit ataasiakkaat katinnerat) kiisalu procenti akileraa-



rutissaq. Aningaasarsianik A-nik akissarsisitsinerit tamaasa sulisitsisup taakku frikortimi allattasavai. Takuuk nalunaarut nr. 10, 20. september 2011-meersoq §§ 15 imm. 2 aamma 16 imm. 2.

Aningaasarsiat akileraarusernagit akissarsiarineqarsinnaasut annerpaaffissaat sinnerlugit aningaasarsianik A-nik akissarsisitsisoqarpat procenti akileraarutissaq atorlugu akileraarusiisoqassaaq.

#### *Skattekortit amigaataappat*

Aningaasarsiortoq hovedkortimik/bikortimik tunniussaqaqngippat/takutitaqangippat akileraarutit A-t aningaasarsiat A-t 45 procentiisut annertutigisut unerartinneqassapput. Tamanna aamma atuutissaq aningaasarsiortup hovedkorti/bikorti akileraaruseriffimmit tigusimannginnerarpagu imaluunniit tammarsimanerarpagu. Takuuk Akileraartarnermut inatsit § 80 imm. 1

Hovedkorti/bikorti amigaataappata sulisitsisup qulakkiissavaa aningaasarsiortup inuttut normuata, aqqata najugaatalu pissarsiarinissaat, taakkulu inuup normuanut uppersarsaat assigisaaluunniit atorlugu uppersarsartillugit. Inuup normua pissarsiarineqarsinnaangippat sulisitsisup qulakkiissavaa ullup, qaammatip ukiullu inuuiup pissarsiarinissaat. Takuuk Nalunaarut nr. 10, 20. september 2011-meersoq § 16 imm. 4.

Akileraartarnermut oqartussaasut paasissutissat hovedkortimiittussaagaluit/bikortimiittussaagaluit sulisitsisumut nalunaarutigisinnaavaat. Taamaattoqarpat akileraarutit A-t taakku tunngavigalugit unerartinneqassapput. Aningaasarsiortup procenti akileraarutissaa sulisitsisup ilisimaguniuk taanna akileraarutinik ilanngaannermini tunngavigissavaa. Takuuk Akileraartarnermut inatsit § 79 imm. 7. Taamaattorli akileraarutissat naatsorsornerini ilanngaasiisoqassappat hovedkorti tamatigut sulisitsisumit tiggummiarneqartassaaq.

#### *Hovedkortip allannguuteqarnerani*

Hovedkorti ukiup ingerlanerani tunniunneqartoq atuutilertarpoq ullormi, akileraartarnermut oqartussaasut atuutilerfiusutut allataanni. Hovedkortimi nutaami ilanngaattit ullup atuutilerfiisa kingorna akileraarutinik ilanngaaqqaarfimmi atorneqassapput. Taamaattoq piumasaavoq hovedkortip nutaap aningaasarsiassat naatsorsornerisa naammassinnginnerini tiguneqarsimanissaa.

Sulisitsisup hovedkorti nutaaq tiguguniuk hovedkorti pisoqaaq aserorterlugu suujunnaarsissavaa.

#### **Feeriarnermi ajunngitsorsianut feeriarneriutinullu atatillugu akileraarutit A-t**

(Assersuutit ilitsersuutip matuma naggataata tungaani takuneqarsinnaapput, tak. *ilanngussaq 1*)

#### *Aningaasarsiaqarani feeriarneq*

Akileraarutit A-t unerartinneqassapput feeriarnermi ajunngitsorsiasat, feeriarnermut allagartamik assigisaanilluunniit tunniussinikkut sulisumut pisassaritinneqalerpata. Akileraarutilli kingusinnerpaamik ukiumi aningaasarsiorfiusumi ullormi 31. december ilanngaatigineqassapput. Tassa imaappoq; 2010-mi feeriarneriutinut katersorneqarsimasut 2011-mi feeriarnermi tunniunneqartussat 2010-mi naatsorsuutitut ilaassapput. Takuuk Nalunaarut nr. 10 20. september 2011-meersoq § 9 imm. 2.

Akileraarutit ilanngaatigineqartussat feeriarnermut allagartamik assigisaanilluunniit tunniussineq si-oqqullugu feeriarnermi ajunngitsorsiassanit ilanngaatigineqassapput.

Feeriarnermi ajunngitsorsiassanit akileraarutit maleruagassat nalinginnaasumik atuuttut malillugit naatsorsorneqassapput. Taamaattorli ilanngaatit naatsorsorneqartarneri pillugit immikkut maleruagassaqarpoq.

Maleruagassat pingasut uku arlaat ataaseq atorpeqarsinnaavoq:

- ukioq ilivitsaq tamakkerlugu naatsorsorneqarpat tamakkiisumillu sulisoqarsimalluni, taava sapaatip akunnerinut tallimanut ilanngaasiisoqassaaq, tassa aningaasarsiortoq sapaatip akunnerini tallimani feeriarsimappat.
- aningaasarsiortup sulisuunerata nalaani *ullut 6-it* (arfininngornerit ilanngullugit) *feeriarnertit tamaasa* sapaatip akunneranut ilanngaat atorpeqassaaq. Ullut feeriarnertit sinnerinut ullormut ilanngaat atorpeqassaaq.
- aningaasarsiortoq sapaatip akunnerini ilivitsuni sulisuusimaneri tamaasa ullormut ilanngaatip 0,7-eriaataa atorpeqassaaq. Ullunik sinneruttoqarpat taakku ilanngaaserneqassanngillat.

*Malugiuk. Feeriartoqartillugu feeriarnertup nalaani aningaasarsisitsisoqarpat ilanngaatissat atorpeqassanngillat, sulisitsisulluunniit hovedkorti tigummigaluarpagu.*

*Akissarsiaqarluni feeriarneq*

Qaammammi qaammatiniluunniit feeriarfiusuni akileraarutinik unerartitsineq qaammatit allat assigalugit pisarnermisut ingerlanneqassaaq. Feeriarnermi ajunngitsorsiassat immikkut ittut – nalinginnaasumik ukiup siuliani aningaasarsiorfiusumi aningaasarsiat 1,5 pct.-ii – tunniunneqalerne-ranni akileraarusigassanut ilaatinneqassapput. Takuuk Nalunaarut nr. 10, 20. september 2011-meersoq § 9.

Aningaasarsiortoq atorfirmunit, akissarsiaqarluni feeriarsinnaatitaaffilimmit soraarpat, feeriarnermi ajunngitsorsiassat katersat aningaasarsiortumut, feeriarnermut allagartamik assigisaanilluunniit tunniussinermi pisassanngortinneqarpat akileraarutinik ilanngarneqassapput. Akileraarutinilli ilanngaaneq kingusinnerpaamik pissaaq ukiumi soraarfigisami ullormi 31. december. Ukiumi soraarfigisami procenti akileraarutissaq atorlugu akileraarutit A-t naatsorsorneqassapput. Hovedkorti ator-neqaraluarpalluunniit akileraarutinik ilanngaanneri ilanngaasiisoqassanngilaq. Takuuk Nalunaarut nr.10, 20. september 2011-meersoq § 9 imm. 1 aamma 2.

Aningaasarsiortoq nalinginnaasumik akissarsiaqarluni feeriarsinnaatitaaffilik sulisitsisorilikkamini feeriassaminik katersaqanngikkaluarluni feeriarpat, taamaattumillu sulisitsorisimasaminut feeriarnermut allagartamik assigisaanilluunniit peqaruni taassuminnga atuisusaaq, piffissaq feeriarfia tamaat pisarnertut ilanngaateqartinneqassaaq, tassa allatut oqaatigalugu sulisitsisorilikkamini qaammammi feeriarfimmini qaammammusiak ikinnerugaluartut qaammammut ilanngaammik ilivitsumik ilanngaateqartinneqassaaq. Tassungali piumasavaoq feeriarnertup nalaani skattekortip sulisitsisorilikkamit tigummineqarnissaa. (*Malugiuk: Ilanngaatit atorpeqanngitsut piffissap aningaasarsifiusup tullianut nuunneqarsinnaammata*).

*Toqusoqartillugu feeriarnermi ajunngitsorsiassat*

Toqusup feeriarnermi ajunngitsorsiassai, matumani ilaallutik toqunissani sioqqullugu aningaasarsiaqarluni feeriassat katersai, ulloq toquffia tikillugu naatsorsorneqartussaapput, ullorlu taanna killiffigalugu maleruagassat nalinginnaasut malillugit akileraarutinik ilanngarneqartussaallutik, tak. Qu-laaniittut. Takuuk Nalunaarut nr. 10, 20. september 2011-meersoq § 10.

### **Aningaasarsiortumut nalunaarut (akissarsiat allagartaat)**

Akissarsisitsinermi sulisitsisup naatsorsuut (allagartaq akissarsiat naatsorsorneqarfiat), makkuninnga paasissutissartalik ilanngullugu aningaasarsiortumut tunniutissavaa:

- aningaasarsiat A-t aamma akileraarutit A-t
- piffissaq akissarsianut tunngasoq
- sulisitsisup aqqa, najugaa, sulisitsisutut kommunia aamma sulisitsisutut normua
- aningaasarsiortup aqqa inuttullu normua
- inuup-normua amigaataappat aningaasarsiortup ulloq, qaammat ukiorlu inuuia allanneqassapput.

Takuuk Nalunaarut nr. 10, 20. september 2011-meersoq § 17.

Aningaasarsiortup akissarsiami allagartaat toqqorsimasariaqarpaa, taannaammammi akileraarutinik A-nik unerartitsisoqarsimaneranut aningaasarsiortup uppersaatissaa.

Feeriarnermi ajunngitsorsiat akileraarutinik ilanngarneqarneranni aningaasarsiortoq feeriarnermi ajunngitsorsiat taakkulu A-nut akileraarutitaasa naatsorsorneqarfiannik tunineqassaaq. Feeriarnermut allagartaq assigisaaluunniit atorneqarpat paasissutissat tassani allassimanissaat naammappoq.

### **Tamakkiisumik akileraaruteqartitsinermut aaqqissuussineq**

1. januar 2011 aallarnerfigalugu inatsit nr. 20, 18. november 2010-meersoq tamakkiisumik akileraaruteqartitsineq atuutinneqalerpoq. Takuuk Akileraaruserinermik ingerlatsineq pillugu Inatsisartut inatsisat nr. 12 § 72 a aamma 72 b.

Tamakkiisumik akileraaruteqartitsineq, inunnit illoqarfiit nunaqarfiillu avataanni aatsitassarsiornermi aammalu suliassanik annertuunik suliaqartunit tuutinneqassaaq.

Tamakkiisumik akileraaruteqartitsineq ima paasineqassaaq, sulisut taaneqartut tamakkiisumik isertitaminnit ilanngaasernagit 35 %-inik inaarutaasumik akileraarutaasussanik akileraaruserneqassasut.

Tamakkiisumik akileraarutit atorfeqartitaanermi akissarsianit, taamatullu ajunngitsorsianit tamanit pissarsiarineqarsimasunit, soorlu akeqanngitsumik nerisaqartitaanerup, ineqartitaanerup, telephoneqartitaanerup il.il. nalinginit naatsorsorneqassapput. Akissarsianulli soraarnerussutisiaqalernissamut kalaallit danskillu selskabiini soraarnerussutisiaqalernissamut aaqqissuussinernut akilersuutit sulisitsisunit aqunneqartut ilaatinneqanngillat, takukkit maleruagassat atuuttut.

Inuit akileraarusersorneqarnerannut allannguinerit inunnut qaammatip siuliini kingullerni arfinilinni Kalaallit Nunaanni kommunimut akileraartussaataasimanngitsunut atuupput, kiisalu atorfeqartitaanermi suliassanut makkuninnga suliaqartitaasunut:

- Sulianik ingerlatani, sanaartornermi sulianik kiisalu ikkussuinerimik ivertiterinermik illoqarfiit nunaqarfiillu piusut avataanni suliassanik suliaqartitaasut.

- Aatsitassaqrneranik misissueqqaarnernut, misissueqqissaarnernut piaanermullu suliaqarti-taasut.

Aaqqissuussinermut ilaatinneqanngillat sulisut, sermip erngullu avammut nioqqutissatut suliarine-qarnerinut suleqataasut aammalu sulisut aningaasarsiat A-nik, aaqqissuussinermut attuumassuteqan-ngitsuniit aamma aningaasarsisartut.

Sulisut ilaannut akileraartarnermi angerlarsimaffik allanngortinneqassaaq.

Inunnut, qaammatit siuliini kingullerni arfinilinni Kalaallit Nunaanni kommunimut akileraartussaa-titaasimangitsunut kiisalu atorfeqartitaanerminnut atatillugu sulianik ingerlatanut, sanaartornermi sulianik aammalu ikkussuinerimik ivertiterinerimik illoqarfiit nunaqarfiillu piusut avataanni sanaar-tornermik suliaqartut imaluunniit ataani taaneqartuni atorfeqartitaasut Akileraartarnermut Aqutsiso-qarfik kommunitut akileraarfittut isigineqassaaq:

- Suliffeqarfimmi, aatsitassat pillugit inatsit naapertorlugu misissueqqaarnissamut misissueq-qissaarnissamullu akuersissuteqarfigineqarsimasumi.
- Suliffeqarfimmi, aatsitassat pillugit inatsit naapertorlugu piaanissamut akuersissuteqarfigi-neqarsimasumi.
- Suliffeqarfimmi, sermip erngullu avammut nioqqutissiarinissaat siunertaralugu nioqqutissi-ornissamut akuersissuteqarfigineqarsimasumi.

1. januar 2011-miit aningaasarsiat A-t aammalu tamakkiisumik akileraarutit tamarmik qulaani allas-simasut kommunip akileraarfiup kodeanik 35-mik nalunaaqutsikkat tunniussinissamut piffissaritit at-uuttut malillugit nalunaarutigineqartassapput. Tamakkiisumik akileraarutit nassuiaami (immersugassaaq A1-imi) akileraarutit A-tut nalunaarutigineqassapput.

Nalunaarutiginninnermut tunngatillugu apequtigiومانeqarsinnaasut Akileraartarnermut Aqutsiso-qarfimmut Sulisitsisut Nalunaarsorsimaffiannut saaffiginnissutigineqassapput.

### **Akissarsiat ilaannik ilanngartuineq**

Sulisitsisoq pisortanut akiligassanut kinguaattoorutinut matussutissanik ilanngartueqqussummik pi-umaffigineqarsinnaavoq. Takuuk Akileraartarnermut inatsit § 101 aamma akiitsunik akiliisitsiniartar-neq pillugu inatsit § 3.

Ilanngartuineq pisinnaavoq akissarsiassanit, honorarisiassanit aammalu aningaasarsiassanit allanit, kiisalu pensionisiassanit (matumanili ilaatinneqanngillat pisortanit pensionisiassat, aningaasat utaq-qiisit allatulluunniit ikiorsiissutit). Aammattaaq ilanngartuineq pisinnaavoq aalisarnermit, piniarner-mit, aallaaniarnermit, savaateqarnermit tuttuuteqarnermillu tunisaqarnermit isertitanit kiisalu sanaa-lukkanik tunisaqarnermit isertitanit. Takuuk Akiitsunik akiliisitsiniartar-neq pillugu inatsit § 3 imm. 2.

Eqqartuussisarnermi inatsimmi maleruagassat naapertorlugit ilanngartuisoqarpat, akileraarutit ilanngaatigereerlugit akiitsullip akissarsiassaasa annerpaamik 33,33%-iinik ilanngartuisoqarsinnaavoq. Takuuk Kalaallit Nunaanni eqqartuussisarnermi inatsit § 625 imm. 2.

Akileraartarnermut inatsit naapertorlugu ilanngartuisoqarpat, akileraarutit ilanngaatigereerlugit tunniunneqartussat annerpaamik 30%-iinik ilanngartuisoqarsinnaavoq. Takuuk Akileraartarnermut Aqutsisoqarfiup nalunaarutaa nr. 292, 21.12.92-meersoq.

Akissarsiat ilaannik ilanngartuisoqartinnagu allanut matusissutissanik ilanngaassoqassanngilaq, soorlu sulisartut peqatigiiffiannut ilaasortaanermut akiliutit ilanngartuisoqartinnagu ilanngaatigineqarsinnaanngillat.

Akissarsiat ilaannik ilanngartueqqussut aningaasarsiortup akiliisitsiniartartullu akornanni nammineq kajumissutsimik isumaqatigiisummik tunngaveqarpat, akissarsiassat tunniunneqartussat 33,33%-iinit annerusumik ilanngartuinissamut periarfissaqarpoq. Takuuk Akileraartarnermut Aqutsisoqarfiup nalunaarutaa nr. 292, 21.12.92-meersoq.

Taamaattorli nammineq kajumissutsimik isumaqatigiisut tunngavigalugu imaluunniit eqqartuussisarnermi inatsimmi aammalu akileraartarnermut inatsimmi maleruagassat malillugit feeriarnersiutit suugalulluunniit, taakku aningaasartaat aningaasarsiat annerpaamik 15%-erippagit ilanngartuiffigineqarsinnaanngillat, tak. akiliisitsiniartarnermut inatsimmi § 4.

Assersuut:

Akissarsiat ilaannik ilanngartuinissamut tunngavik:

Akissarsiat .....	15.000 kr.
ATP-mut soraarnerussutisiaqalernissamullu aaqquissuussinernut ilanngaati- neqarsinnaasunut akiliutit .....	<u>- 800 kr.</u> 14.200 kr.
<u>Akileraarutit A-t unerartitat</u> .....	<u>- 4.144 kr.</u>
Akissarsiat tunniussassat (ilanngartuinissaq sioqqullugu)	10.056 kr.

Ilanngartuinissamut tunngavissat assersuummi tassaapput akissarsiat tunniussassat.

Akilerartarnermut inatsimmi maleruagassat naapertorlugit ilanngartuinerit eqqartuussisarnermi inatsimmi maleruagassat naapertorlugit ilanngartuinermit salliutinneqassapput.

Aningaasat, akissarsianit qaammammi ilanngartuinikkut illikartinneqarsimasut, akilerneqassapput qaammatisiutit malillugit qaammatip ilanngaassiffiusup tulliata 10-nganni, kingusinnerpaamillu akilerneqareersimassallutik qaammatip pineqartup tulliata naanerani. Takuuk Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaat nr. 3, 2. maj 1996-imeersumi § 3 imm. 6.

(Assersuut: sulisumut kingumoortumik akissarsiaqartumut aprilimi akissarsiassaanit ilanngaassine-  
rit akiligassanngussapput 30. april, kingusinnerpaamillu akilerneqareersimassallutik 31. maj.)

Sulisitsisoq ilanngartueqqusummik piunaffigineqarsimasoq ilanngartueqqusineramik malinninngik-  
kuni ilanngartugassarigaluanut taarsiisussaataavoq. Takuuk Akiitsunik akiliisitsiniartarneq pillugu inatsit § 3 imm. 5.

Akissarsianit ilanngartuinerit qaammatit tamaasa Akiliisitsiniartarnermi Oqartussanut nalunaaru-  
tineqartassapput. Ilitsersuut Akilerartarnermut Aqutsisoqarfiup nittartagaani [www.aka.gl](http://www.aka.gl) –imi  
pissarsiarisinnaavat. Akissarsianit ilanngartuinerit elektroniskiusumik ugguuna nalunaarutigineqas-  
sapput: <https://sulinal.nanoq.gl>

Akissarsianit ilanngartuisarnermut maleruagassat pillugit nalornissuteqassaguit, Akilerartarnermut  
Aqutsisoqarfimmut, Qitiusumik Akiliisitsiniartarnermi Oqartussanut saaffiginnissaatit.

## 4. Akileraarutit A-t pillugit nassuiaat sukumiisoq akilerneqarnerilu

### Aningaasarsiat A-t akileraarutillu A-t pillugit nassuiaat sukumiisoq

Sulisitsisup qaammatit tamaasa qaammammi ilanngaassiffiusumi aningaasarsiortut ataasiakkaat aningaasarsiaat A-t (akileraarutinik ilanngarneqanngitsut) aamma akileraarutaat A-t unerartitat kiisalu sulisoqarnermut akitsuummumut akiliutissaq pillugit paasissutissiisassaaq. Takuuk Nalunaarut nr. 10 20. september 2011-meersoq § 12 imm. 1 aamma § 28.

Sulisitsisoq 20-it imaluunniit sinnerlugillugit sulisoqarsimappat, paasissutissat digital-ikkut nalunaarsorneqartassapput. Sulisitsisoq aamma ikinnerusunik sulisoqartoq paasissutissanik digital-ikkut tunniussinissaminut periarfissaqartoq, internet-imullu atassuteqartoq piumaffigineqarsinnaavoq digital-ikkut nalunaaruteqarnissaminut. Takuuk Nalunaarut nr. 10 20. september 2011-meersoq § 12 imm. 2 aamma 3 aammalu § 28 imm. 2.

Sulisitsisut digital-ikkut nalunaarsuinngitsut, paasissutissat nassuiaat sukumiisoq A1 atorlugu nalunaaruteqartassapput. Takuuk Nalunaarut nr. 10 20. september 2011-meersoq § 12 imm. 5 aamma § 28 imm. 4.

Immersugassaq A1 kiisalu digital-imik nalunaaruteqarnissamut iltsersuut uani takuneqarsinnaapput: <https://sulinal.nanoq.gl>.

Assersuut:

Akissarsiaritit katinneri, A1 malillugu .....	<u>100.000 kr.</u>
Akileraarutit A-t katillugit, A1 malillugu .....	32.000 kr.
Sulisoqarnermut akitsuut akissarsiaritit katinnerisa 100.000 kr.-it 0,9%-iat .....	<u>900 kr.</u>
Akiligassat katillugit .....	<u>32.900 kr.</u>

Nassuiaat sukumiisoq Sulisitsisut Nalunaarsorsimaffiannut kingusinnerpaamik nassiunneqassaaq qaammatip ilanngaassiffiup tulliani qaammatip ulluisa qulingani. Qaammatip ulluisa qulingat arfininngorneruppat, sapaataappat nalliuttuuppalluunniit nassitsinissamut periarfissarititaq uuluinnaasumut tullermut sivitsorneqassaaq. Takuuk Akileraartarnermut inatsit § 81 imm. 3.

### *Nassuiaat sukumiisoq kingusinaartumik nassiunneqarpat*

Nassuiaat sukumiisoq piffissareqqusaq eqqorlugu nassiunneqanngippat sulisitsisup qaammammi pineqartumi akiliutissaq, akileraarutit A-t 2%-iisut annertutigisoq akilissavaa. Akiliutissaq minnerpaamik 500 koruuniuvoq annerpaamillu 1.000 koruuniulluni. Immikkut pissutissaqartillugu sulisitsisoq akiliutissamik Sulisitsisut Nalunaarsorsimaffianit akiliinngitsoortinneqarsinnaavoq. Takuuk Akileraartarnermut inatsit § 81 imm. 4.

*"0-imik nassuiaat sukumiisoq"*

Sulisitsisoq qaammammi aningaasarsianik A-nik akissarsisitsinngikkaluarpalluunniit nassuiaat sukumiisoq (0-imik nassuiaat sukumiisoq) nassiunneqassaaq. Sulisitsisut Nalunaarsorsimaffianni na-

lunaarsorneqarsimajuartilluni tamanna pisussaaffiuvoq. Takuuk Nalunaarut nr. 10 20. september 2011-meersaq § 12 imm. 1 aamma § 28 imm. 1.

### *Suliffeqarfiup ingerlajunnaarnera*

Sulisitsisup suliffeqarfiutini ingerlakkunnaarpagu ingerlatsiunnaarnermiit kingusinnerpaamik ullut 10-t qaangiutsinnagit, nassuiaatit sukumiisut aamma akissarsiat allagartaat ukiumoortut, suliffeqarfiup uninnissaata tungaanut nassiunneqassammata. (*Eqqaamallugu* feeriarnersiutissat aamma ilanngunneqassammata). Takuuk Akileraaruserinermik ingerlatsineq pillugu Inatsisartut inatsisaanni § 30, imm. 1.

### *Peqqissaannginneq sumiginnaanerlu*

Piffissareqqusamit qulaani taaneqartumit akulikinnerusumik sivikinnerusumilluunniit piffissaliilluni sulisitsisup nassuiaatinik sukumiisunik nassitsinissamut akileraarutillu A-t akilernissaannut Sulisitsisut Nalunaarsorsimaffianit peqquneqarsinnaavoq. Tamanna makkuninnga pissuteqarsinnaavoq:

- nassuiaat sukumiisup piffissaq eqqorlugu nassiunneqartanngippat
- nassuiaat sukumiisup paasissutissanik amigartunik imaqartoq nassiunneqartarpat
- akileraarutit A-t unerartitat piffissaq eqqorlugu akilerneqartanngippata

Takuuk nalunaarut nr. 10, 20. september 2011-meersaq § 14.

### *Nassuiaat sukumiisup nassiunneqanngippat*

Sulisitsisup nassuiaat sukumiisup nassiutinngippagu akileraarutit A-t sulisitsisup akiligassai missingersukkamik angissusilerlugit Sulisitsisut Nalunaarsorsimaffianit aalajangerallarneqarsinnaapput. Takuuk Akileraartarnermut inatsit § 93 imm. 3.

### *Nassuiaatini sukumiisuni nassiunneqareersimasuni kukkunerit*

Nassuiaatip sukumiisup immersornerani kukkusoqarsimappat, kukkuneq iluarsineqarsinnaasarpoq. Sulisitsisup kisitsisit nassuiaatini sukumiisuni nalunaarutigeriikkaminni iluarsiissutillorsinnaavoq sulisunut ataasiakkaanut annertusillugit imaluunniit annikillillugit, qaammatini kukkuffiusuni iluanni. Iluarsiissutit kisitsisit saavani + imal. – imik aallaqqaaserlugit.

### *Feeriarnermi ajunngitsorsiassat pillugit nassuiaat sukumiisup*

Eqqaamaneqassaaq decemberimut nassuiaat sukumiisup feeriarnermi ajunngitsorsiassanik taakkulu akileraarutitaannik A-nik imaqqassamat, aatsaalli feeriarnermi ajunngitsorsiassat siusinnerusukkut sulisumut pisassanngorlugit tunniunneqarsimannngippata taamaattumillu siusinnerusukkut nassuiaammi sukumiisumi ilaatinneqarsimanatik.

Feeriarnermi ajunngitsorsiassat pillugit paasissutissat immikkut allanneqartariaqanngillat, aningaasarsioritulli ataasiakkaat decemberimi aningaasarsiaannut A-nut akileraarutaannullu A-nut ilaatinneqarsinnaallutik. Taamaattorli feeriarnermi ajunngitsorsiassat decemberimut nassuiaammi sukumiisumi immikkoortinneqarnissaat pitsaaquteqarsinnaavoq, tassami kisitsisit tassani pineqartut ukiup naanerani naatsorsuutit oqimaaqatigiissinnerini feeriepengitut akiitsutut takoriaannaassammata.



Ilitsersuutip matuma naggataata tungaaniittoq assersuut nassuiaatip sukumiisup immersorneqartarneranut tunngasoq takuneqarsinnaavoq, tak. *ilanngussaq 2*.

### **Akilaraarutit A-t aamma sulisoqarnermut akitsuutit akilerneqarneri**

Qaammatisiutit malillugit qaammatip ingerlanerani akilaraarutit A-t sulisitsisup unerartissimasai, qaammatip tulliaata aallaqqaataani akiligassanngussapput, kingusinnerpaamik piffissaq eqqorlugu akiliiffissaq tassaalluni qaammatip ulluisa 20-at. Qaammatip ulluisa 20-at arfininngorneruppat, sa-paataappat nalliuttuuppalluunniit akiliinissamut piffissarititaq ulluinnaasumut tullermut sivitsorneqassaaq. Assersuutigalugu martsip qaammataani akilaraarutit A-t akiligassanngussapput 1. april, kingusinnerpaamilu piffissaq eqqorlugu akilerneqassallutik 20. april.

Akiliuteqarneq (akilaraarutit A-nik sulisoqarnermullu akitsuutit tamakkiisunik) Akilaraartarnermut Aqutsisoqarfimmut pissaq. FI-kortit nassiuuneqarsimasut atorlugit imaluunniit web-bankikkut akiliisoqarsinnaavoq. Bankikkut nuussinermi eqqaamaneqassaaq sulisitsisup IIN-normua kiisalu akilaraarutit A-t/sulisoqarnermut akitsuutit akilerneqartut qaammammut sorlermut tunngasuuneri allanngussammata.

#### *Kingusinaarluni akiliuteqarneq*

Sulisitsisup akilaraarutit A-t piffissaq eqqorlugu akilinngippagit qaammatip akiliiffissap aallaqqaataaniit aallartittumik ernialersuisoqassaaq qaammammut 2%-inik.

Assersuut: Januarimi akilaraarutit A-t unerartinneqartut februarip naanerani akilerneqanngippata minnerpaamik 4%-inik ernialiisoqassaaq (2+2, tassa februar aamma marts pillugit).

Ernianik naatsorsuinermi øriinnaat ilanngunneqassanngillat.

Akilaraarutit A-t piffissaq eqqorlugu akilerneqanngippata akilaraarutit A-t kingusinaarluni akilerneqarnerinut ernialersuinerup saniatigut sulisitsisoq akiliisinneqarluni "pillarneqarsinnaavoq". Tamanna aamma atuuppoq sulisitsisoq ikinaarluni unerartitsippat nalunaaruteqarpalluunniit.

Akilaraarutit A-t, sulisoqarnermut akitsuutit, ernialiussat aamma akiligassiissutit akilerneqanngippata, akiisut Akiliisitsiniartarnermi Oqartussanit akilersinniarneqalissapput. Tamanna pigisanik arsaarinninnikkut imaluunniit akissarsiassat, aningaasat namminersortutut pissaasa, tunisinermi aningaasarsiassat il.il. ilaannik unerartitsinikkut pisinnaavoq.

## **5. Akissarsiat allagartaat ukiumoortut aamma akissarsiarititanut nalunaarut ukiumoortoq**

Sulisitsisup ukiut tamaasa januarip qaammataata naannginnerani Sulisitsisut Nalunaarsorsimaffiannut ukiumi qaangiuttumi akissarsiarititat aamma akilaraarutit A-t unerartinneqarsimasut paasisutissiissutigissavai. Matumanilu feeriarnermi ajunngitsorsiassat taakkulu A-nik akilaraarutitaat ilanngullugit.

Sulisitsisoq 20-nit amerlanerusunik sulisoqarpat akissarsiarititat pillugit elektroniskiusumik nalunaartoQASSAAQ. Sulisitsisut 20-it ataallugit sulisoqartut elektroniskiusumik nalunaaruteqarnissamut periarfissallit aamma taamaaliornissamut akilarauseriffimmit peqquneqarsinnaapput. Ukiup

ingerlanerani sulisut ataasiakkaat akissarsiaasa allagartaat ukiumoortut (A11) pillugit nalunaarutit nassiaatit sukumiisut pineqartarnerat assigalugu periarfissat marluk arlaat atorlugu nalunaarutigineqarsinnaapput. Pappiaqqatigut imaluunniit elektroniskiusumik. Ilitsersuut kiisalu immersugassat uani takuneqarsinnaapput: <https://sulinal.nanoq.gl>

#### *Akissarsiat allagartaat ukiumoortut (A11)*

Akissarsiat allagartaat aningaasarsianik A-nik akissarsiaritinneqartunik tamanik kiisalu aningaasarsiat B-t ilaannik aamma sulisutut ajunngitsorsiarineqartunik imaqqassapput, tak. akileraaruserinermik ingerlatsineq pillugu inatsimmi § 30, tassani allaqqammat ukiumoortumik akissarsiat allagartaanni paasissutissiissutigineqassasut sulisorisap soraarnerussutisiaqarnissaanut imaluunniit inuunermut sillimmasiinnermut aqqissuussinernut sulisitsisup akiliutai, kiisalu tamakkiisumik ilaannakortumilluunniit akeqanngitsumik ajunngitsorsiat, soorlu nerisaqarlunilu ineqarneq, akeqanngitsumik illoqarneq, najugaqarneq, angalanerit, biileqarneq, telefoneqarneq il.il. Aammattaaq sulisitsisup pisussaaffigaa kisitsisit nalunaarutigineqartut pillugit aningaasarsiortumut (akissarsiortumut) ilisimatitsinissaq.

#### *Akissarsiarititanut nalunaarut ukiumoortoq (A10)*

Sulisitsisup aammattaaq nassutissavaa akissarsiarititanut nalunaarut ukiumoortoq (A10), akissarsiarititat il.il. tamarmik katinnerannik imaqartoq. Sulisitsisut ukiumik kipungasumik naatsorsuusiorfillit qaammatisiutit malillugit isertitat ukiumut naatsorsuusiorfimmumut agguataarlugit nalunaarutigissavaat.

Akissarsiarititanut nalunaarummi ukiumoortumi aningaasarsiat A-t aamma akileraarutit A-t katinneri akissarsiat allagartaasa ukiumoortut ukiullu ingerlanerani nassuiaatit sukumiisut kisitsisitaasa katinnerinut nikingassanngillat.

Suliffeqarfik unippat paasissutissat pineqartut assingi kingusinnerpaamik kingullermik akissarsisitsinnermiit ullut qulit qaangiunnerini tunniunneqassapput.

Aningaasarsianik qulaani taagorneqartunik akissarsiortoq Kalaallit Nunaannut akileraartussaajunnaarpat paasissutissiisussaataq qinnuigineqaruni paasissutissiisussaavoq qaammatisiutit malillugit ukiup aallartinneraniit akileraartussaajunnaarnerup tungaanut pineqartoq qanoq amerlatigisunik isertitaqarsimansoq kiisalu akileraarutit A-t qanoq amerlatigisut unerartinneqarsimansut.

Paasissutissat assingi aamma qinnuteqartoqarneratigut pineqartumut imaluunniit pineqartup sinniisaanut, toqusulluunniit pigisaanut tunniunneqassapput.

## **6. Aningaasarsiat A-t, akileraarutit A-t aamma sulisoqarnermut akitsuutit pillugit naatsorsuutit**

Sulisitsisoq pisussaavoq aningaasarsiat A-t akissarsiaritinneqartut aamma akileraarutit A-t unerartinneqartut pillugit naatsorsuuteqarnissamut.

Akissarsiarititanut naatsorsuusiorfiit bilagitaat ilanngullugit ukiup naatsorsuusiorfiup pineqartup naanerata kingorna ukiuni tallimani toqqortarineqassapput.

## **7. Sulisitsisut Nalunaarsorsimaffiannut nalunaarneq**

Kalaallit Nunaanni sulisitsisut tamarmik Inuussutissarsiummik Ingerlataqartunik Nalunaarsuiffimmi II-imi nalunaarsortissimassapput kiisalu IIN-normussaminnik tunineqartussaallutik. IIN-imi nalunaarsortinniarnermi immersugaq kiisalu apeqquteqaataasinnaasut uunga nassiunneqassapput: [cvr@nanoq.gl](mailto:cvr@nanoq.gl) imaluunniit Sulisitsisut Nalunaarsorsimaffiannut, oqarasuaat 346081-imut sianerikkut saaffiginnittoqarsinnaalluni.

Namminersorluni inuussutissarsiuteqartoq kiisalu sulisuminut akissarsitsisaruni aammattaaq Akileraartarnermut Aqutsisoqarfimmi Sulisitsisut Nalunaarsorsimaffianni nalunaarsortittussaapput [sulinal@nanoq.gl](mailto:sulinal@nanoq.gl)-imut allagaqarnikkut imaluunniit oqarasuaat +299 346081-imut sianerluni saaffiginnikkut.

Sulisitsisut Nalunaarsorsimaffiat tassaavoq sulisitsisup akileraarutininik ilanngaasarneq pillugu apequtininik tamanik saaffigisassaa. Sulisitsisut Nalunaarsorsimaffiat aamma taassaavoq sulisitsisut ilitsersuummi matumani maleruagassanik malinninnerininik nakkutilliususaq.

Sulisitsisut Nalunaarsorsimaffiannut ilannguttoqartarpoq immersugassap immersorneqarneratigut. Immersugassaq uani aaneqarsinnaavoq: [www.aka.gl/immersuiffissat](http://www.aka.gl/immersuiffissat). Taanna Sulisitsisut Nalunaarsorsimaffiannut tunniunneqassaaq imaluunniit nassiunneqassaaq kingusinnerpaamik aningaasarsisitseqqaarnermiit ullut 10-t qaangiunnerini. Tamanna aamma atuuppoq akissarsisitsinermi akileraarutit A-t "0"-iugaluarpataluunniit (nul).

Sulisitsisut Nalunaarsorsimaffiannut nalunaarnissaq pingaartuuvoq. Taamaaliunngikkaanni akiliisitaasoqarsinnaavoq.

Sulisitsisut Nalunaarsorsimaffiannut nalunaaruteqarnerup kingorna Sulisitsisut Nalunaarsorsimaffianniit *sulisitsisup normussaa, taannalu cvr-normoq assigivaa*, sulisitsisumut nalunaarutigineqassaaq. Cvr normoq akileraarutininik ilanngaasarneq pillugu saaffiginninnerit tamatigut oqaatigineqartassaaq.

Suliffeqarfik unippat tamanna kingusinnerpaamik akissarsisitsinermi kingullermiit (imaluunniit feeriarnermi ajunngitsorsiassat naatsorneqarneriniit) ullut 10-t qaangiunnerini Sulisitsisut Nalunaarsorsimaffiannut nalunaarutigineqassaaq. Aammattaaq sulisitsisup najukkami allanngornera imaluunniit suliffeqarfimmik piginnittuunermut tunngasut allannguutaat Sulisitsisut Nalunaarsorsimaffiannut nalunaarutigissavai.

## **8. Sulisitsisunik nakkutillineq**

Aningaasarsianit akileraarutit pillugit Inatsisartut inatsisaat malillugu sulisitsisut isumagisassaminik nammassinninnissaat qularnaarumallugu Sulisitsisut Nalunaarsorsimaffianni sulisut "sulisitsisunik nakkutilliinermik" suliaqarsinnaapput. Tamanna pisinnaavoq sulisitsisup suliffeqarfiutaanut ornigunnikkut. Naatsorsuutit bilagitaat ilanngullugit Akileraartarnermut Aqutsisoqarfimmut aamma nassiateqquneqarsinnaapput.

Sulisitsisunik nakkutilliinermi naatsorsuutit tamaasa misissorneqarsinnaapput. Skattekortit uppernarsaatillu allat nakkutilliinermut pingaaruteqartut saqqummiunneqarnissaat piumasarineqarsinnaavoq.

Naatsorsuutininik misissuinermi aningaasarsiat naatsorsuutaasa bilagitaasalu misissorneqarnerisa saniatigut aammattaaq sulisitsisup naatsorsuutaasa sinneri misissorneqarsinnaapput.

Misissuiartorsinnaaneq, uppernarsaatinik saqqummiusseqqusineq aammalu naatsorsuutininik bilagitaannillu nassiusseqqusineq ullormut akiliisitsisarnikkut pinngitsaaliissutigineqarsinnaapput. Paasissutissat nakkutilliilluni misissuinermi atugassat aamma aningaasarsiortunit pissarsiariniarneqarsinnaapput.

Pingaartumik sulisitsisunut nutaanut kaammattuutigineqassaaq nalornissutit sapinngisamik piaartumik Sulisitsisut Nalunaarsorsimaffiannut paasiniarneqartarnissaat - saaffiginninnikkut imaluunniit sulisitsisunik nakkutilliisunit pulaarneqarnissamik qinnuteqarnikkut.

## **9. Sulisitsisup akisussaaffia, akiliinissamut akisussaataitanera aamma pillarneqarsinnaanera**

### *Sulisitsisup akisussaaffia aamma akiliinissamut akisussaataitanera*

Unerartitsisussaataitaq taassumaluunniit piginnaatitaa akileraarutit A-t akilerneqarnissaannut akisussaataitaapput.

Suliffeqarfiit arlaqartut sulisitsisutut ataatsitut nalunaarsorneqarsimasut (interessentskabit assigisaalluunniit) akiliinissamut assigiimmik akisussaaqatigiipput.

Akiliinissamut akisussaataitap aammattaaq nassuiaatit eqqortumik immersorneqarnissaat piffissaritinneqartorlu eqqorlugu nassiuunneqarnissaat akisussaaffigai.

Aningaasarsianit akileraarutit pillugit Inatsisartut inatsisaat naapertorlugu akileraarutininik A-nik unerartitsisussaananerminik naammassinninngitsaq, imaluunniit minnaaraluni akileraarutininik ilanngaa-soq, minnaarutigineqartut akilerneqarnissaannut akisussaatinneqassaaq, suliassaminik sumiginnaasimanginnini qularnaallisarsinnaanngikkuniuk.

Nassuiaatinik sukumiisunik amigaateqarnerup imaluunniit amigartunik naatsorsuuteqarnerup kingunerisaanik sulisitsisumut akiliutigeqqusat eqquissumik naatsorsorneqarsinnaanngippata sulisitsisunik nakkutilliisut akileraarutit A-t akilerneqartussat missingersorlugit amerlassusilerallarsinnaavaat.

## ***Sulisitsisup pillarneqarsinnaanera***

Aningaasarsianit akileraarutit pillugit Inatsisartut inatsisaat naapertorlugu sulisitsisoq akiliisitaanermik allatulluunniit pineqaatissinneqarnermik pillarneqarsinnaavoq, taanna piaaraluni mianersuaalliorujussuarluniluunniit

- akileraarutininik A-nik unerartitsinngippat imaluunniit minnaarlugit unerartitsippat,
- akileraarutit A-t unerartitat piffissaliunneqartoq eqqorlugu akilerneq ajorpagit,
- nassuiaat sukumiisoq piffissaliunneqartoq eqqorlugu nassiunneq ajorpagu,
- nassuiaammi sukumiisumi eqqunngitsunik paasisutissiippat

Taamatuttaa q maleruagassanik allanik ilitersuummi matumani taagorneqartunik unioqquitsineq akiliisitsinikkut pillarneqarnermik kinguneqarsinnaavoq.

## **10. Sulisunut akeqanngitsumik ajunngitsorsianik assersuutit**

Ukiut tamaasa Naalakkersuisut sulisunut akeqanngitsumik ajunngitsorsianik angissusiliineranik nalunaarusiortarput, taakkuli akileraaruteqaataapput. Akeqanngitsunik ajunngitsorsiat ukuusinnaapput:

- Akeqanngitsumik biileqartitaaneq
- Akeqanngitsumik oqarasuaaterqarneq
- Akeqanngitsumik inissaqartinneq
- Akeqanngitsumik nerisaqarneq
- Akeqanngitsumik nerisaqarneq (*sociale institutioner m.v.*)
- Akeqanngitsumik nerisaqarneq, inissaqartitaaneq aamma akeqanngitsumik angalatitaaneq (*aatsitassanut ikummatissanut aamma kommunit avataanit inissisimasut il.il.*)
- Akeqanngitsumik najugaqartitaaneq
- Akeqanngitsumik nioqquutissanik atuineq
- Akeqanngitsumik qamutininik motoorilinnik atugaqartitaaneq, Kalaallit Nunaata avataani inissisimasunut
- Akeqanngitsumik internet-eqarneq
- Akeqanngitsumik ineqarneq
- Akeqanngitsumik angalaneq

*Akeqanngitsumik angalaneq aatsaat akileraaruserneqartarpoq, inuk pineqartoq akeqanngitsumik sulisitsisimiit angalatitaasunut ukiumi aningaasarsiorfiusumi, ataaseq sinnersimappugu, taava aappaa akileraaruteqaataasussaannilaq.*

### **Direktør-inut isumaqatigiissut**

*Suliffeqarfik aktie imaluunniit anpartsselskab-iusimappat, direktør-inut isumaqatigiissuteqartariaqarpoq.*

### **Pigineqataasunut atukkiussineq (aktiaatilik)**

Akilerartarnermut inatsimmi §16 a. malillugu, allanngortinneqartoq ulloq 26. Juni 2017, pineqartut selskabit il.il §1, imm. 1, normu 3 aamma 4 Kalaallit Nunaani angerlarsimaffillit, pineqartut imannak:

- Aningaasaliinerit
- Atukkiussinerit imaluunniit
- Qularnaveequtimik inummut timitalimmut tunniussineq

Akilerartarnermut inatsit naliginnaasut najoqqutaralugu atukkiussineq suliarineqarpat....

## **11. Sulisunik attartortitsineq**

Indkomstskattelovens §76, stk.4, ændret 26. Juni 2017 om arbejdsudleje gælder, at indeholdelsespligten ved udbetaling af vederlag til en person, der stilles til rådighed for at udføre arbejde her i landet af en virksomhed, der ikke har hjemsted i Grønland, påhviler den, for hvem arbejdet udføres. Dette gælder dog kun, hvis arbejdet udgør en integreret del af virksomheden her i landet. D.v.s., at den hjemmehørende arbejdsgiver bl.a. har:

- instruktionsbeføjelsen over for personen
- kontrol af arbejdet
- regning og risiko for aktiviteten

Hvis det konstateres, at bl.a. ovenstående er opfyldt, anses den grønlandske virksomhed m.v. i skattemæssig henseende for den reelle arbejdsgiver og har dermed indeholdelsespligten.

## **Ilanngussaq 1. Naatsorsuinissamut assersuutit**

### **1. Akileraarusigassat qummut amnullu akunnaallineqartarnerinut maleruagassat.**

Akileraarutit naatsorsunnginneranni kisitsinissamut pisariillisaatit akileraarusigassat kr.-inut ilivitsunut naatsorsorneqartartut, kisitsimmut qaninnermut 10-mik agguarneqarsinnaasumut *ammut akunnaallineqarsinnaapput*. Taava akileraarutissat A-t naatsorsorneqareerunik kr.-inut ilivitsunut qaninnernut *qummut akunnaallineqassapput*.

Aningaasarsiat A-t tamarmiusut .....	5.000 kr.
- hovedkortimi sap.ak. ilanngaattissat, assersuutigalugu .....	<u>1.115 kr.</u>
Akileraarusigassat ammut akunnaallineqanngitsut .....	3.885 kr.
<b>Koruuninut ilivitsunut 10-mik agguarneqarsinnaasunut qaninnernut ammut akunnaallineqassapput .....</b>	<b>3.880 kr.</b>
Akileraarutit A-t 42%-it naatsorsukkat .....	1.629,60 kr.
<b>Taakku koruuninut ilivitsunut qaninnernut qummut akunnaallineqassapput .....</b>	<b>1.630 kr.</b>

### **2. Akileraarutissat naatsorsorneqarneri.**

#### ***A. Hovedkorti - aningaasarsiat A-t hovedkorti malillugu ilanngaattissanit anginerupput.***

Aningaasarsiorup hovedkortini tunniussimappagu akileraarusigassat imaapput:

Aningaasarsiat A-t tamarmiusut .....	5.000 kr.
- hovedkortimi sap.ak. ilanngaattissat .....	<u>1.115 kr.</u>
Akileraarusigassat ammut akunnaallineqannginnerini .....	<u>3.885 kr.</u>
taakku koruuninut ilivitsunut qaninnernut "0"-imik naggaserlugit ammut akunnaallineqassapput. Tassa ammut akunnaalleereernermi akileraarusigassat tassaapput .....	3.880 kr.
Akileraarutit A-t taakkunannga naatsorsorneqassapput. Hovedkortimi procenti akileraarutissaq 42%-iuppat akileraarutit A-t tassaapput .....	1.629,60 kr.
ørinnaallu amerlassusaat apeqqutaatinnagu koruuninut ilivitsunut qaninnernut qummut akunnaallineqassapput .....	<u>1.630 kr.</u>

Tassa assersuummi qulaaniittumi allassimasutut akileraarutit A-t tassaapput 1.630 kr.

#### ***B. Hovedkorti - aningaasarsiat A-t hovedkorti malillugu ilanngaattissanit mikinerupput.***

Hovedkortimi sap.ak. ilanngaattissat sap.ak. akissarsianit angineruppata imaassaaq:

Aningaasarsiat A-t tamarmiusut .....	1.000 kr.
- hovedkortimi sap.ak. ilanngaattissat .....	<u>1.115 kr.</u>
Akileraarusigassat	<u>0 kr.</u>

Tassa akileraarutit A-t "0"-iupput.

### **C. Bikorti**

Aningaasarsior tup bikorti takutissimappagu akileraarusigassat tassaassapput = aningaasarsiat A-t ilanngaasernagit, taamaattorli koruuninut ilivitsunut 10-mik agguarneqarsinnaasunut qaninnernut ammut akunnaallillugit.

### **D. Frikorti**

Aningaasarsior tup frikorti tunniussimappagu, frikortip saqqaani "akileraarutinik ilanngarnagit aningaasarsiarineqarsinnaasut annerpaaffissaat" ukiumi aningaasarsiorfiusumi aningaasarsior tup aningaasarsiaanit A-nit nallerneqartinnagit akileraarutinik ilanngaasoqassanngilaq.

Soorlu frikorti 58.000 kr.-inik annerpaaffissaqarpat, taava taakku 58.000 kr.-nit angutinnagit aningaasarsiat A-t akileraarusernagit tunniunneqartassapput. Tamatuma kingorna procenti akileraarutissaq ator neqalissaaq.

Frikortimi aningaasarsiat akileraarusernagit annerpaaffissaat .....	58.000 kr.
Skattekortip tunuani allasimasat malillugit aningaasarsior tup allanik sulisitsisoqarluni A-nik aningaasarsiarisimavai katillugit .....	54.000 kr.
"Aningaasat akileraarusigassaannngitsut" sinnerupput .....	4.000 kr.
Tullianik aningaasarsinissami aningaasarsior tup A-nik aningaasarsiasai tamarmiusut 6.000 koruuniupput, taamaattumik frikortimi sinneruttunik ilanngarneqassapput .....	4.000 kr.
Frikortimi sinnerupput .....	0 kr.
Akileraarusigassanngorput .....	2.000 kr.
Frikorti malillugu procenti akileraarutissaq 42% .....	840 kr.

**Tassa aningaasarsior tup kingullermik akissarsinermini tigusassai tassaapput kr. 6.000 - kr. 840 = 5.160 kr.**

### **E. Skattekortit amigaataappat.**

Aningaasarsior tup skattekortini tunniussimannngippagu akileraarusigassat tassaassapput = aningaasarsiat A-t tamarmiusut koruuninut ilivitsunut 10-mik agguarneqarsinnaasunut qaninnernut ammut akunnaallisat. Akileraarutit A-t 45%-inik ilanngarneqassapput.

Aningaasarsiat A-t	3.455 kr.
Ammut akunnaallillugit	3.450 kr.
Akileraarutit A-t 45%-it	1.552,50 kr.
Taakkulu koruuninut ilivitsunut qaninnernut qummut akunnaallineqassapput .....	1.553 kr.

## **3. Feeriarnermi ajunngitsorsiat feeriarnersiutillu akileraarutitassaannik naatsorsuineq.**

### **A. Akissarsiaqarani feeriarneq**



- ukiup ilaani sulisimasoq

Feeriarnermi ajunngitsorsiat ullormi 31.12.-imi ukiumi isertitaqarfiusumi akissarsiat minnerpaamik 12%-iisut naatsorsorneqassapput (tak. feeriarnermut inatsit).

Piffissaq suliffiusimasoq tassaavoq sap.ak. ilivitsut 21-t + sap.ak. affat marluk. Hovedkorti malillugu ullormut ilanngaatisaqq .....	159 kr.
Feeriarnermi ajunngitsorsiat tamarmiusut .....	10.153,84 kr.
Sap.ak. ataatsimut ullormut ilanngaat 0,7 (21 x 0,7 x 159 kr.) .....	<u>2.337,30 kr.</u>
Akilerarusigassat .....	7.816,54 kr.
Ammut akunnaallillugit .....	7.810 kr.
Akileraarutit A-t 42%-it (koruuninut ilivitsunut qaninnernut qummut akunnaallillugit) .....	3.281 kr.

Feeriarnermi ajunngitsorsiasat feeriarnermut allagartamik (allatulluunniit naatsorsorneqarfiannik) tunniussinikkut pisassarilersinneqassapput .....	10.153,84 kr.
- akileraarutit A-t .....	<u>3.281,00 kr.</u>
Ukiumi feeriarfissami tunniunneqartussat .....	<u>6.872,84 kr.</u>

- ukioq isertitaqarfiusoq tamaat sulisimasoq

Feeriarnermi ajunngitsorsiat ullormi 31.12.-imi ukiumi isertitaqarfiusumi akissarsiat minnerpaamik 12%-iisut naatsorsorneqassapput (tak. feeriarnermut inatsit).

Piffissaq suliffiusimasoq: Ukioq tamaat sulisimavoq. Feeriarnermi ajunngitsorsiasat tamarmiusut .....	30.000 kr.
Akileraarutit naatsorsorneqassapput:	
Hovedkorti malillugu sap.ak. ilanngaatisat 5 (tallimat) .....	<u>5.575 kr.</u>
Akilerarusigassat .....	24.425 kr.
Ammut akunnaallillugit .....	24.420 kr.
Akileraarutit A-t 42%-it .....	<u>10.256,40 kr.</u>
Taaku koruuninut ilivitsunut qaninnernut qummut akunnaallineqassapput <b>10.257</b> koruuninut.	

Feeriarnermi ajunngitsorsiasat feeriarnermut allagartamik (allatulluunniit naatsorsorneqarfiannik) tunniussinikkut pisassarilersinneqassapput .....	30.000 kr.
- akileraarutit A-t .....	<u>10.257 kr.</u>
Ukiumi feeriarfissami tunniunneqartussat .....	<u>19.743 kr.</u>

**B. Akissarsiaqarluni feeriarneq**

- qaammammut akissarsialik, akissarsiaqarluni feeriarsinnaatitaaffilik soraarpoq 1/4.

Feeriarnermi ajunngitsorsiassat sulisitsisup imatut naatsorsussavai:

1. Ukiumi qaangiuttumi akissarsiat 12%-ii	28.800 kr.
2. Ukiumi soraarfimmi piffissami 1.1.-31.3 akissarsiat 12%-ii	<u>7.200 kr.</u>
	36.000 kr.

Akileraarutit naatsorsorneqassapput:

Akileraarutit A-t 42% feeriarnermi ajunngitsorsiassanit	15.120 kr.
---	------------

**EQQAAMALLUGU:** Aningaasarsiortut akissarsiaqarlutik feeriartartut soraarnerinut atatillugu feeriarnermi ajunngitsorsiassaannik naatsorsuineri hovedkorti malillugu ilanngaasiisoqartussaangimmat.

**MALUGALUGU:** Naatsorsuineri ukiut isertitaqarfiusut marluk pineqaraluartut, akileraarutini A-nik naatsorsuineri ukiumi soraarfimmi skattekorti malinneqassaaq. Feeriarnermi ajunngitsorsiassat tamarmiusut ukiumi soraarfimmi akileraaruserneqassapput.

Feeriarnermi ajunngitsorsiassat feeriarnermut allagartanik marlunnik (allatulluunniit naatsorsorneqarfiannik) tunniussinikkut pisassarilersinneqassapput:

1. Ukiup soraarfiup siuliani isertitat pillugit:

Feeriarnermi ajunngitsorsiassat pisassat	28.800 kr.
- akileraarutit A-t	<u>12.096 kr.</u>
Ukiumi soraarfimmi (feerialermeri) tunniunneqartussat	<u>16.704 kr.</u>

2. Ukiumi soraarfimmi isertitat pillugit:

Feeriarnermi ajunngitsorsiassat pisassat	7.200 kr.
- akileraarutit A-t	<u>3.024 kr.</u>
Ukiumi tullermi feeriarfissami (feerialermeri) tunniunneqartussat	<u>4.176 kr.</u>

